

余自甲戌仲夏抵都迄今辛巳歲屈指幾何
矣日在東華軟紅中求閑居一室嘯歌之樂未易
得然於趨朝退食之餘友朋文酒之會或登臨覽
勝尋花弄月之辰景物所觸微吟寫志積而計之得
詩若干首昔曹子桓云人多不強力營目前之務遺
千載之功杜陵云文章千古事得失寸心知余自顧
才劣性慵復牽於人事顛毛種種學殖荒落而乃以
虫鳴瓦響質諸當代伶倫牙曠之前豈特燕石遼豕
而已哉而爲是帙者不過識年月表一時之興會云
爾至丙子奉使告祀畿內古帝園陵巳卯扈從

鑾輿南幸並有紀述另爲一編茲不復載時康熙辛巳
嘉平雲間王九齡題於長安寓舍

尊香堂詩稿

雲間王九齡薛澱

五言古詩

雜詩

驅車事行役言經泰岱山
一何峻百折蒼松盤
白雲如匹練木末懸飛湍
天門在何許搔首徒長歎
廿載繼微祿茲邦數往還
山色青自若而我髮已斑
安期不可遇誰爲駐顏顏
會當凌日觀學取朝霞餐

其二

我有一頃田乃在秦望側
寄語耦耕人逝言同藝稷

雙鯉昨南來開緘興太息爲言歲不登墟里轉蕭瑟
獸窮思攫人民窮易作慝深林可長往鶴鷓號白日
褰裳涉河湄射影憂沙蟲山鬼岩之阿眈眈虎而翼
谿壑鮮坦途烟霞生痼疾不如九天上俯仰聊自得
斯語或一道且止勉厥職東方我所師金馬饒真逸

其三

黃香昔爲郎省闈作安宅高柔事魏祖抱書夜不釋
勗哉欽乃司庶幾臣力竭顧余蓬茅士薄劣類樗櫟
短翮隨長風翱翔入鳳闕黃扉載濫竽星星頭半白
敢云筋力疲奉職懼隕越坐待東方明九重門未

關尺寸安所禪黽勉不遑夕飽聞荒鷄聲起舞嗤祖
逖

其四

峩峩長安城中多陽翟賈奇貨埒山丘黃金輕於土
呼吸許史通權貴託肺腑前庭羅瓊肴後堂選歌舞
妖童櫻桃妍少婦春山嫵上書請輸邊平地拾簪組
出牧尊若神小吏畏如虎陋巷有儒官蕭然守環堵
看囊一錢無終歲獨愁苦

其五

松柏惟直上死作棟梁器屈曲桃李枝三春徒自媚

丈夫處世間樹立亦何異直哉申屠嘉嘔血因權貴
望之性素剛殺身嬖倖致破柱李元禮垂白殞北寺
強項說董宣貧困終下吏奕代景諸賢生時都不遂
姓氏耀簡編嶽嶽丘山視小人競一時君子計萬世
厭厭泉下人曹蜍與李志

其六

闐闐難久居駕言出西郭平日雨乍收長林烟霧幕
絡緯餞朱明蓐收行赴約楊柳綠欲黃槐花開且落
鼓吹聽羣蛙奚止兩部作亭午不覺暄還訝締衣薄
世事等逝波到眼即成昨百歲曾幾何今我胡不樂

其七

張湯漢酷吏繼起得安世良弼數房杜承家乏令嗣
天道作善昌報施何憤憤或云子賢愚乃由義方致
甯越詎被捶虞賓出唐帝松柏自干霄蔓草終委地
高下性使然轉移良匪易彭澤責諸郎賦詩亦多事

其八

生本烏衣家舊識金陵道金陵古名都佳麗東南少
遺勝一探尋鶯花六代杳景陽久作塵臨春宿寒鳥
狐兔窟園陵金屋飛黃阜桃葉與桃根飄零隨蔓草
試問故東陵惟有瓜地好天運似轉圜奚用愴懷抱

廢興誰閱多冷眼江山飽

其九

元保遇好官宋主輒見思書淫劉孝標沒齒不見知
窮達各有命明明亦何私茵席與糞溷花飛任所之
人心若淵海隴蜀曷底時有錢但沽酒庶免達者嗤

其十

莫植當門蘭當門易摧折莫作當途人當途易蹉跌
漢代霍將軍威名何烜赫權移萬乘尊要路盤枝葉
殺生掌握間百僚咸震懾身沒墳未乾妻孥對嗚咽
第門忽自壞舉室隨灰滅盛衰理固然四運迭相易

所以秦應侯功成推蔡澤亦有陶朱公扁舟五湖適

其十一

嘖嘖燕市中荆卿稱俠客騁雄一匕首吁嗟計何拙
縱使殺秦王政斃燕亦滅彼哉高漸離擊筑踵覆轍
扑之又中同盡究奚益子房智勇人博浪椎悞擊
潛匿趨下邳幡然學黃石兵法屺上傳亡秦三寸舌
報韓志卒酬全身允明哲

其十二

涼飈颯然至時序驚已秋柞櫓復改燧大火星正流
羈客憚喧囂愛此斗室幽詎意邁疾疢兩耳增煩憂

彷彿林中蟬日暮鳴不休時苦耳鳴庶幾商節屆氣爽或
稍瘳鱸魚空自肥素髮盈我頭傷彼安仁賦懷哉張
翰舟

對月感舊

嚴冬狎曦陽盛暑凌涼月玩月坐中宵故人悵離別
伊昔班荆初金閨甫通籍出並鳳沼翔入對芳樽熱
風雨亦雲從連朝兼竟夕歡會得幾時去住參商隔
或逐宦海萍或作投林翮海濶與天長數載音塵絕
豈徒念考槃還悲逝川客徐陳早芝焚應劉繼玉折
酒罷黃公鑪涕灑山陽笛生者有時逢死者成永訣

聚散固靡常榮落詎一轍安得三五蟾終古無完缺

次韻答汪涵齋前輩

我家五湖東與君共江滸駿足讓先驅名場稔甘苦
爰追折檻雲亦伴登瀛杜瑱闈日迴翔湛恩沐

聖

主峻擢佐尹畿詩書化椎魯宦海突波興往事漫覩

縷邂逅涿鹿城茅茨集鳳羽時適討不庭窮邊聞戰
鼓春風送征驂把臂秋月吐三復穆如篇隋珠投合
浦

同人集沈樂存侍御齋分韻得春字

高堂輪奐美日晏羅衆賓中厨出異饌野藪間山珍

一斗未云醉百罰詎厭頻當筵數君子忘形任天真
得意起狂叫頽然或脫巾丈夫意氣合異姓猶一身
何必連根產迺稱骨月親矧我舊諸侶散若飄埃塵
掉頭一以別契濶冬復春題書覓雁足騁目空高旻
存者尚乃爾遑問泉下人興酣顧四座鬢髮各已銀
百年曾幾何營營徒苦辛我家申浦南十畝富松筠
駕言返舊都東海堪投綸有客忽揺手言從泖水濱
時周礪
岩初至行藏余判矣君毋念菘蓴三吳洵樂土氓俗未
大淳連卷小山桂牧豎斧作薪龜鼉倚窟宅吹浪欺
潛鱗欲追雲間鵠反類籠中鶉亦知猿鶴怨難令麋

鹿馴余聞三太息茲語或有因天門深九重此地可
逡巡勉旃圖報稱庶勿忝朝紳漫擬平子賦且安東
方貧酒闌更命酌寒鷄喔嚮晨去去蓬池上回首桃
花津

初夏李園雅集分韻得山字

仕宦繫 京洛如墜雲霧間羣蜂鑽故紙焉知天地
寬好花開自落候鳥徒間關疇爲選勝地斗酒相歡
顏招邀得好我結駟遨平泉窈窕岩壑古亭臺清且
閑此中可忘世奚必逃空山行厨豐膳具痛飲吸百
川縱談鋸木屑霏霏落四筵禮豈我輩設箕踞或不

冠行樂貴及時千載指一彈薰風吹秀萼俯仰春復
闌衰榮有代謝任運達者觀試看舊堂燕來往仍躡
躑

祝巢閣學太夫人六十限賦十首每章三韻

温温夫人姿淑德誕名閥祖父早攀鱗勲名侔日月
醴泉亦有源于歸萬人傑

其二

桓桓統領公疆場矢戮力封豕與長蛇揮矛談笑得
飲至還 廟堂茂烈旂常勒

其三

功成喜不伐揖客稱將軍南州榻屢下北海賓常醺
咄嗟疇辦此閨中有細君

其四

細君德曜齊奚獨佐中饋師行理餽糧辦嚴及鞭轡
盡瘁有同心焉知家室累

其五

翩翩雙鸞鷺和鳴集喬林比翼中道折獨宿長悲吟
願言捐微軀柰此雛鳳心

其六

截髮湛氏懷遷鄰孟母瘁講藝與論兵亦各行爾志

勉旃念所生母俾家聲墜

其七

長公人中龍滿腹貯經史縱談千百年滾滾若流水
追琢珪璋成用以獻

天子

其八

天子曰良哉堂構爾繼武 儲禁奉 元良綸扉昇心
簪豈徒視草賢行取 山龍補

其九

仲君嫺韜略烈烈如熊羆入則脩環衛出則舉旌旗

弄雛慈親側既翕兄弟宜

其十

三五八月秋太君週甲子斑斕舞袖妍冠蓋闐珂里
睂壽南山長稱觴從此始

夏雨後晨入 東長安門

候曉陟 金門清風滌煩燠磊落明星稀烏鴉散林

木社稷壇內多宿鳥樓闕烟霧濛朝衫宛新沐閭者擁被眠呻呼

睡尚熟緩步玉闌橋延頸望晴旭俯視溝水流帶雨

聲噴瀑白露猶未零蒹葭亦已綠懷哉五湖東一丘

繞松竹薄宦日銜羈蠨蛸踞茅屋濫荷 天恩穹未

敢理初服溷跡鷓鷯間撫躬恧麋鹿

蕙香堂詩稿

雲間王九齡薛澱

七言古詩

甲戌季夏苦雨和廬陵韻荅宋太史葯齋

驀地雷驚北海龍斯須雲壓西山麓五日十日不宥
休傾淮倒峽差堪擬羲和驅車何處匿天作漏卮流
無底市上俄傳米價騰朔飢那與侏儒比空塔滴瀝
攪安眠微醺高枕資芳醴三輔農夫祈有秋田禾若
沒憂生齒九衢鞍馬逐波浪兀坐宛在孤舟裏六月
未半涼風颼投竿渴想鱸魚美比鄰好友蘭臺君衝

泥顧我楚然喜萍梗奚須嘆望洋閑曹久矣門如水
同人集史耕岩寓齋分賦題竹林七賢圖

魏晉之交百六會高賢往往逃物外四友八達未足
誇竹林七子洵稱最七子領袖數嵇康才多性烈好
用光踞視權貴若螻蟻彈琴日送歸鴻翔陳留嗣宗
欣同調詠懷文筆嗟神妙廣武名輕豎子成鸞音遙
聽蘇門嘯瀟灑誰能繼此風道南道北少追從庭懸
犢鼻人驚問逸興端應許仲容舍是更說劉與向才
華並轡襟期曠秀也會聞注老莊伯倫聊復耽佳釀
屈指羣賢達者稀山公位望百僚歸日陳啓事羅英

彥慮策銷兵早見機彼哉阿戎斗筭客何緣忝廁名
流席俗物生平無寸長三公事業惟鑽核爾時七子
真莫逆狂呼散髮娛晨夕睥睨禮法是何物一斗一
石爭浮白竹林嘉話滿寰區丹青照耀光篇籍我今
披圖堪羨亦堪吁丈夫肯作高陽徒聖人從來貴名
教裸裎昏縱寧良圖整頓乾坤須實用談元說空胡
爲乎放達頽波不可論神州典午竟沉淪勸君漫詬
王夷甫嵇阮將無作俑人

上

御書篤志經學四大字扁額 賜少宗伯韓慕廬前

葦恭賦七古一章用誌盛事

承平之代運會昌九霄每覩垂奎章天子有道玩好
絕娛神翰墨揚芬芳伊時儒臣多拜賜尺牘隻字同
琳瑯即如貞觀稱極治太宗妙蹟耽鍾王又如仁宗
善飛白人間偶得什襲藏俯仰千秋孰振起銀鈎八
法尊

今皇猗與 聖德追堯舜挈宋提唐勲業峻圖書寢食
萬幾餘牙籤玉軸金華進 睿藻天成亘古稀如椽
筆掃龍蛇陣 御額曾聞錫股肱門庭生色盈 朝
慶羣仰昭回雲漢高難從常侍登床競蒙 恩屈指
昌黎公雄才巧奪造化工領袖詞場幾十載遐陬僻

壤爭趨風生平嗜書切飢渴微言欲絕神明通緝柳
編蒲何足數劉涇杜癖將無同論經滾滾若河注常
談一洗開愚蒙撼世聲名徹 宸聽獨對 召入蓬
萊宮臨池灑翰美薦學驚鸞舞鳳翔蒼穹北面稽首
躬捧出鈎摹鐵畫懸堂中雲連墨寶龍紋黑日映雕
梁玉璽紅觀者嘖嘖咸太息藝林盛事傳無窮寄語
儒生須努力凡茲孰非稽古功宗伯文章我所師堂
廉恰喜際明時君不見六經注就康成老潦倒何由
漢主知

豐臺芍藥歌

京師芍藥世罕有五色鮮妍大如斗春深何處花最
多豐臺爛熳開千畝此地但苦無屋宇黃塵赤日看
難久況且有花不知愛園丁折賣希餬口別墅幸得
謝太傅時游宛平閣師園怡情卜築依林藪晴軒洞達八窗開
綽約妖姿環左右輕紅一片鬪朝霞素華縞潔如玉
藕若教弱植對傾城宓妃無色爨光醜欲數千株復
萬株誰能算此須隸首勝境從來未易逢攜壺耽賞
偕良友脫略形骸互主賓銅盤下箸饒菘韭庭前老
槐大十圍綠陰如蓋臨窗牖醉來倚樹發狂言涼風
彷彿深秋後世間塞馬總無憑一升一沉猶反手吾

生衣食取裁足何必粟紅與貫朽把臂歡呼樂未終
西山斜日垂高柳歸路還尋陌上花當筵肯負杯中
酒

寄壽單山舍

憶昔童年騎竹馬累棋搏蠟北堂下從母頻過舅氏
家逢君初作乘龍者乘龍門漾浙江潮碧柳千章白
板橋覓徑追歡閑鬪草尋山作伴好鳴橈青春漸壯
各南北咫尺高齋但遙矚抱膝君居秦望陽讀書余
住松溪曲空林嚶鳥喜相求訪戴舟乘雪夜遊田家
鷄黍尋常設下榻欣然信宿留聚散俄看若萍水一

官余滯長安里索處愁瞻薊北雲三年南國空桃李
緘書昨日接郵筒申甫知生仲夏中蓬矢門連仙艾
綠壽筵酒對石榴紅處世如君真極樂齊眉黃髮甘
葵藿少君同挽鹿車行吹笙還跨緱山鶴膝前有子
况能文汗血常空萬馬群大鵬端待秋風起一朝瞬
息凌青雲人生奚必厭枯槁林間歲月人難老試看
東華十丈塵何如倚杖南山好松菊遙思三徑存年
來歸夢繞江村他時乞得閑身去定訪龐公到鹿門
東宮有白鹿一高數尺領小白鹿二其一即所產也

圖之於扇濯濯松石間

命詞苑數臣賦之

世間何物稱竒特蒼鹿千年改白色雪花一片散滿
身禎符獸應金方德賦質由來山野多畢生擬向林
間匿羅致何期天網恢遭逢晨夕 瑤山側收錄真
蒙造化仁養成兼費虞官力約略當前數尺高霜毛
皓奪臯禽翼町疃塲開 閭苑邊危峰林立長松直
皎皎寧爲空谷駒啣啣每愛呼群食大者領袖小者
隨含靈長幼偏能識昌後欣看麟趾振子孫相繼應
千億竊聞保世在率由孝思善繼白鹿遊又聞鹿性
多長壽茲物若見宜黃耆瑞獸逍遙 鶴禁閑誰傳
風骨畫圖間好驂仙使雲中駕親獻西王白玉環

通政周蓉湖前輩閩游次延津即雷煥子龍劍
化去處行次建寧環城皆鐵冶謀鑄劍不果
後龐太史雪崖出守是郡屬以鑄劍越三歲
以雙劍貽之因作歌紀其事

先生藉甚金閨彦文章獨步雄壇坵冲霄意氣元龍
豪不愛雕蟲愛擊劍古來寶劍稱千將鑄就那得百
鍊剗風胡不作歐冶沒截蛟切玉嗟無方龐公雪崖
如膠友剖符爰拜建寧守先生聞命輒然喜青萍
旦晚入我手片帆憶昔度延平二水分流合處清雷
煥之子曾過此腰間三尺懸豐城一朝神物忽躍去

至今時有蒼龍鳴建州城下多良匠幾回夢落延津
上出牧何期得故人到時好把純鈎餉士元昨日一
書來開緘頓慰三秋望并鐵千錘鑪冶精名工加製
蟠螭狀相看兩兩有雌雄映月凌雲雪色同清夜一
麾神鬼泣鬱葱寶氣成雙虹先生把玩不忍釋含笑
對酌金罍空酒酣慷慨輒起舞世情齷齪無一可眼
前誰是英雄人劍乎劍乎君知我

平魏忠賢墓歌贈張松岩侍御

熹宗之世明將亡左右肺腑惟貂璫就中元克誰竊
柄忠賢魏闡尤鴟張玩弄人主嬰兒似上公威燄凌

侯王趙姚中外朋作奸伸手障日天茫茫鼠輩蟻附
競獻頌建祠俎豆侔宮墻楊左諸公捋虎鬚宵小磨
刃屠忠良李膺被陷范滂收身填牢戶五毒嘗古來
刑餘類陰賊亂政彷彿漢與唐論罪戮屍未足蔽生
時偏營朽骨藏碧雲寺聚死狐窟菟裘爰卜于經傍
規模宏壯僭陵寢朝官拱侍森冠裳麒麟駝馬左右
列雕鏤異狀爭騰驤又有雙碣隧道立崢嶸百尺干
穹蒼列街重叠不可了大書深刻數十行昔余游展
會到此縱觀疾首嗟無方安得排山五丁手爲我異
代除豺狼清河侍御文章伯埋輪輦轂同張綱請

夷奸墓封章上追討亂賊嚴秋霜九重朝奏夕
報可特頒綸綍荷

聖皇丘墳鏟盡豐碑倒牽車絡繹胥徒忙累代垢濁一
旦洗山靈色喜林壑光君不見侯覽當年起生壙石
椁雙闕踰典常舉奏發憤賴張儉破厥瑩域直節揚
丈夫遭際冠鐵柱建白要爲世道防如君此作真快
舉千秋青史流芬芳

尊香堂詩稿

雲間王九齡薛澱

五言律詩

臘月同人分賦節物

綵燕

羽翼誰相假翩翩出畫樓纔能舞掌上早見宿釵頭
成厦寧知賀無巢不解愁東君何限巧一任剪刀收
祀竈

司竈恒饒舌明禋舊俗存親祠惟漢武善媚總王孫
饌設黃羊美觴行白酒温叮嚀拜老婦好爲達天閭

藏鈎

競逐探鈎戲鈎藏若箇邊察顏爭注目對壘各擎拳
豪飲輕千斛狂呼撼四筵偶然闖入握似聽捷書傳

大儼

都市鳴鼗鼓如林擁道周朱衣矛戟利白日鬼神搜
遺制垂三代流風徧九州共知貧有崇誰問玉堂幽

土牛

合土成犁犢爭看亦宛然相公將問喘牧豎欲揮鞭
通道輸金貴賈糧讓木堅迎春偏重爾旌旆郭門前

桃符

寂寞荆扉掩俄驚日月徂臘殘拋舊曆春至換新符
七貴光添宅千家板作圖傍人門戶立終歲笑神荼

臘鼓

百面如霆發星回紀又窮愁看顛種種厭聽鼓逢逢
燕市枹難息時寓中有
梁上之擾雷門響或同細腰騎屋擊回首

記兒童

梅葉

寒濃梅尚凍陽動煖微熏香氣含千朶春心露一分
着枝珠的的轉眼雪紛紛芳樹家園滿相思獨有君

翠柏

亭亭凌北陸冉冉入東皇色奪千竿竹香浮九醞觴
春盤先蓼菲老幹集鸞凰豈必繁華歇纔知壓衆芳
辛盤

隨俗開芳宴迎陽破薄寒臘經三戍日春對五辛盤
老辣薑同性微酸橘是官肥甘風味淺莫道菜根難

爆竹

景物隨時異喧闐到處同厲驅千戶外臍盡一聲中
動地驚雷震薰天仗火攻不煩圖鬱壘破竹有神功

紅椒

詩詠椒聊實靈葩產蜀山辛香傳紫闥善頌得紅顏

久服頭常黑堆盤色更殷鍾繇吞欲死痴絕爲嬌鬟

屠蕪

元日向高堂團圞對舉觴歲憐衰髮益酒遜少年嘗

白獸

朝端設黃柑臘底香但期長醅酌佳節忘他

鄉

孟冬同人讌集分題詠物

熏鼠

晝伏宵纔出由來鼠善藏彼思營密室我慮在蕭墻
驅逐難爲力燒除自有方倘然成火浣卒歲可縫裳

映雪

飛絮長空滿風飄積座端色連書几淨光逼夜窗寒
遠勝然藜照何勞借月看五車兼六出常伴一儒官

其二

昏黑千門夜辛勤萬卷家無烟生玉燭有影落瓊花
喜愜三餘志愁添兩鬢華輸他陶學士侍女試烹茶
甲戌秋由通政司叅議遷翰林院侍講學士

家居緣讀禮幾載滯蒿萊才入銀臺裡還從玉署來
拜官膺異數華國忝凡材故吏原相識趨迎笑
口開

充

日講官起居注恭紀

講幄稱華選詞曹第一流幾年淹鳳沼此日上螭
頭天語聞來切鑪烟望裡浮何期蓬蓽士垂白傍
珠旒

少司成張寄亭招飲宛平相國豐臺別業看芍

藥次家孟瑁湖韻

何處饒紅藥豐臺壓鳳城良朋騎馬出賢主挈壺行
柳翠餘春色蟲鳴入夏聲昨宵微雨後風日曉來清

其二

勝地張高宴相看一解顏杯浮金鑿落山繞玉連環

但得花常艷何妨髮已斑此中誰伴客雙燕恰飛還
其三

雲林郊外趣端數謝公家庭覆三槐樹園栽百畝花
涼秋宜玩月暑日好浮瓜逸興平生足寧愁後會賒
其四

飄爾清風至明窗面面開華堂新改築我輩舊曾來
對酒忘形妙藏鈎着意猜歡呼當永日誰信夕陽催
其五

欲去頻回首難忘景物幽名園供我賞佳句得兄留
人世須行樂鶯花足破愁莫言桃洞遠猶可託神游

晨入詹事府時爲少詹事

寮友平明集庭閑靜不譁歛錢分種柳
時偕同官各種花柳於署中課
吏學澆花座上清言妙簷前白日斜有時叅末議逐
隊向東華

入直

南書房

侍直儒臣寵聯翩入未央盤餐叨內膳奔走有中璫
地逼天威重宮深晝漏長百僚誰到此獨數秘書
郎

送平湖令王東岩

君今捧檄處風物我能言
綠柳迴村市清流到縣門
簾前稀聽訟花下好開樽
他日推循績中年是弟昆

送學士史耕巖 扈從塞外

扈蹕蒙宸眷清秋度漢關
鳴鞭隨鳳輦行幄侍龍顏
霜冷天邊月雲昏塞外山
計程懽會日應待菊花斑

其二

吾黨遭逢盛如君得幾人
方霑禁苑酒史子曾賜宴內苑旋奉屬車塵
館閣拈毫久龍蛇賜墨新
豈惟名位重况復尚青春

重陽家桀齋招集慈悲庵登高和山濤韻

客裏逢佳節相邀共舉觴
渚清葭吐白霜老葉飄黃
行樂囂塵外長談古寺旁
憑高聊送日烟景得蒼蒼

其二

百尺崇岡峻斜連萬堞城
山啣寒日夕風挾怒潮聲
素髮支離態黃花節候情
何時重會此飽看月華生

其三

昔時蓬觀裏一姓忝稱昆
重作三山客欣逢九日尊
窮秋平野淨醉眼暮雲昏
徒御催人別寒鴉噪寺門
寓齋粗葺劉後齋以詩見贈次韻答之

逆旅圖容膝蓬窗勝綺櫳家寒先惜費屋小不勞工
對酒邀明月留賓坐好風若移數竿竹瀟灑子猷同

其二

每到高齋裡烹茶對異書比因泥濘甚坐遣往來疎
水憶簷前繞人疑樓上居會當鞭瘦馬觸熱訪庭除
潘女未字殉節詩

義重一身輕蘭閨守獨貞人間香不散自經後有餘香不散天上夢

先成

殺之前多夢旌旗鼓吹迎入天闕

已負齊眉願還羞斷臂名肯同二君者

臨難輒偷生

入栢府作時由少詹事授僉都御史

東觀虛縻祿頻年住 帝都久隨池上鳳忽聽府中

烏桑海殘碑在

都察院係明通政司舊署碑記尚存

風霜老栢孤承 恩簪白

筆報 國愧訐謨

郊外秋泛汪東川前輩約登高至期不果次韻

奉荅

憶昨同秋泛扁舟對舉杯林稀霜果熟荻老雪花開
別浦隨鷗去良朋載酒來是日陳農部送酒至重陽眼底近携手上

高臺

其二

登高曾有約誰共掌中杯辜負羣賢會空憐野菊開

沉酣千日少佳句百朋來行樂隨時得何須戲馬臺
夏日移竹生笋和友人韻

產自篔簹谷新移傍石根似龍堪作杖比稻復生孫
銷夏清陰美經冬勁節存成林他日茂留共醉芳樽
賦得燕不背貧家和韻與徐景三

畫棟多非故蕭條水一涯惟存雙海燕不羨五侯家
來往窺簾熟低徊顧影斜官同蜂與蝶到處逐繁華
送大司空熊蔚懷前輩致政歸江右

未至懸車歲飄然出紫微舟浮范蠡去人賜鑑湖
歸岩際芝常采江間鱖正肥夔龍高卧處林谷有光

輝

次韻答張少司馬曼園郊遊之作

偶結鷓鴣隊言游薜蘿林塔鈴閑自語野殿晝常陰
桃李添新葉烟霞渺故岑江南春更好何日恣幽尋
其二

摩挲先代物憔悴對塵容世事看桑海浮名笑鼎鐘
花無天女散松有大夫封得暇期公等還當裏宿春

時同觀萬壽寺
鐘昌運宮古松

庚辰春闈典試作

校武曾圍棘丁丑主武會試重來已四年昔看霧豹變今喜谷

鶯遷把卷燈常落披衣月尚懸不將方寸竭莫報
聖恩偏

其二

畫角喧朝日銅壺滴晚風遴材集萬國接席傍三公

時沁州孝感兩相國為正主考

非分遭逢異澄懷鑑別同自憐經百折忍

不念飄蓬

庚辰蒙

恩賜御書唐王維和僕射晉公扈從温湯五言排律詩

一首恭紀時為僉憲

疇昔

龍文賜

巳郊扈從南巡蒙賜御書視草二大字

叨陪

鳳輦遊

即今冠鐵柱復得拜銀鈎兩劍逢津合雙珠入掌

收殊恩沾九列盛事說千秋

竊祿

竊祿成何補經年栢府居無聲慚仗馬有淚對刑書

僉憲與法司事

史冊人難跂雲林願復虛白頭濫朱紱中夜獨

躊蹰

庚辰七月由僉都御史遷內閣學士

甫入烏臺裡俄登政事堂座陪黃閣老人對紫薇郎

綸綍揮毫疾光陰直日長遭時應努力寧計髮毛蒼

隆冬

隆冬午夜後排闥怒風生斗帳聞鷄起天街踏雪行
衾裯留好夢鎖鑰候嚴城迨至槐堂上東方一半明
奉輓宮允嚴州方夫子

砥行同圭璧閑襟任葛天青錢文有價白首坐無羶
猶是蓬窗客空名閭苑仙高賢宜上壽何意厄龍年

其二

夫子移居日高齋幸比隣談經猶在眼問字向何人
大冶思宗匠恩波感涸鱗西州門載過駐馬幾沾巾
庚辰充武

殿試讀卷官恭紀

別苑熊羆集 龍旂曜日明挽弧多破的伐鼓少停
聲馬足連雲騁鴻毛舉鼎輕

天王親貫革猿臂浪傳名

其二

深宮魚貫入清夜漏初傳卷展 金蓮下名題 玉
案前爪牙材莫敵霄漢鑑無偏何幸夔龍後鴛行雁

序聯

時與伯兄瑁湖少
詹同充讀卷官

輓師叔彭瞻庭侍講

之子何爲死龍蛇厄運時時歲在辰人生真有命天道太無
知京國醫難問窮愁力不支 東朝調卹厚泉路

沐恩私

歿後東宮賜白金五十兩

輓劉後齋鴻臚卿

黃土長埋日斯人髮尚青
生涯同石火故舊已晨星
曾共聯詩句憑誰醉醪醑
愁看蓬沼上玉樹自亭亭

公即艾堂

新選庶常

輓吳楞香祭酒

憶昔古揚州萍踪幾日留

去歲扈從次邗溝晤吳子於客舍

劇談才一面

分手便千秋廊廟各空噪
陔蘭願已酬山陽存舊

伴忍聽笛聲愁

懷史耕岩於河上

南國愁洪水西清借近臣
且將挾天手權作伐蛟人
世路多夷險神龍善屈伸
竭來強飯否樂道莫憂貧

其二

聞說高郵住連天總白波
何人共杯酒伴客有鼃鼃
袖為思親濕詩應憶友多
幾時宣室召連騎聽鳴珂
許少司空時菴齋中觀奕

國手何方至楸枰壁壘新
群言同塞耳一着妙通神
忘世多王質爭先做積薪
試看戰敗者盡是局中人

待旦

待旦趨天闕微聞玉漏聲
鳳城鷄喔早蟻國夢

初成警夜憑圓枕呼僮辨啟明人生頭易白強半爲
簪纓

送少司寇巢寄菴之奉天任

根本 陪京重文人領法曹 金門丹詔下鐵嶺白
雲高政理騰輿誦官閑引濁醪惟瞻親舍遠晨夕夢
魂勞

其二

携手

青宮入聯鑣紫閣回

余與巢子同爲少詹復同爲閣學

與君論夙

昔無地不追陪別酒鶯聲勸離亭柳色催賓鴻他日
滿搔首八行來

辛巳清明

松楸瞻拜後兩地夢魂牽丘壠長千里鶯花又一年
無由生健翮有恨結重泉畢世依親墓高風忝昔賢
贈張真人

采藥丹崖外朝天碧落間百神迎鶴駕 雙闕拜
龍顏楊柳金臺暗桃花石洞閑塵寰肯久住抗疏乞
還山

濫竽

濫竽窺秘閣荏苒半年過吏引朱衣少詩吟紅藥多
入朝聞曙鳥歸路見明河報稱良非易滄江穩綠

簑

山桃

聞說春郊外山桃爛若霞一窺温室樹虛負曲江花
習習如籠鳥勞勞送日車人生行樂爾何事老京
華

春日赴 苑啓事畢同曹蓼懷前輩游萬壽寺

由廣源閘沿堤而歸

天苑聯鑣至林端聽早鴉坐時依 御柳墻外識

宮花時苑中
山桃盛開入對 龍顏近分班雁字斜從容車馬散

歸路望中賒

其二

昔年過此地破寺歎塵封不遇 九重主誰懸萬石

鐘萬壽寺有巨鐘露處日久
上命建室懸之法書留貝葉鐘內外書佛經係
明學士沈度筆翠色落

長松寺有
古松久坐談興廢斜陽掛遠峰

其三

郭外長渠接波明可浴鳧遠山青一抹嫩柳絲千株
聯騎停金勒攜樽想玉壺晴郊吟眺處春思滿平蕪

其四

韶光如轉轂擾擾馬蹄中髮變千莖白花仍二月紅
蜜蜂喧暖日粉蝶戲和風何處懷南國扁舟有釣翁

喜宮允吳鶴臯至 都

石友連凋謝

時瞻庭後齋
相繼下世

襟期慘不開喜從淮水上添得

故人來昨歲愁分袂今宵對舉杯相看何莫逆廿載
共芸臺

暮春 苑中直廬雜詩

習靜空堂裡遲遲日影殘千山飄雪滿三月著裘寒
問柳愁無伴攤書懶獨看漫誇東閣貴爭似一麤官

其二

怪殺飛廉惡無端吼大風四郊塵霧裡一葉海濤中
林際摧新綠花間捲落紅閑居堅閉戶寂寞與誰同

其三

若木升朝旭 芳園值暮春雲含

天子氣花落相公茵百轉鶯歌巧千章柳葉新軟塵驚
忽起流水響朱輪

其四

勞擾形神憊幽閑耳目空超然人世外惟有直廬中
遣興啣杯數長吟索句工只愁驅馬去塵市復怱怱

其五

一棹離申浦三年滯洛塵花開 上苑樹人憶故園
春水色粘天碧山光着雨新遙憐五楊柳空待宦游

身

其六

鳳城猶咫尺搔首暮雲遮
宇內原爲客浮生各戀家
窗虛微透月風急亂鳴鴉
獨伴明鐙坐含情數落花

其七

鵠立瞻天苑金扉映日開
綠楊牆外繞丹綵禁
中來舜命傳三事堯言徧
九垓不才叨視草握管重
徘徊

其八

四野狂飈息乾坤始覺春
草堂晴捲幔簷日暖宜人

鳥語鈎輈樂花枝窈窕新
好攜童冠輩南陌踏芳塵

其九

廢寺鄰芳苑新脩梵宇崇
豈真資佛力毋乃仗天
工初地名卿集禪房野店
同趨承疲長老漫說萬緣
空

其十

庭前春鳥喚門外柳絲垂
高枕消長日吟詩當奕棋
人疑大隱地我作讀書帷
惜乏羊求輩歡然對一卮

其十一

至尊臨別殿鴛鷺自成羣
玉座金鑪設名香御手

焚御榻置寶鑪一
上親取香焚之隔墻啼好鳥當戶落晴雲幸覩天顏
霽從容笑語聞

其十二

鹿鹿牽塵網昏昏又晚春仕途無樂地大塊有勞人
柳色青堪染顛毛白似銀不辭風雨出深媿葛天民
同年沈樂存侍御粵東視鹺回京

持節住南荒風清滿路霜北歸燕月迥南望嶺雲長
果憶檳榔醉花憐茉莉香驚看三載別雙鬢覺微蒼

郊原

郊原春漸老過眼隙駒中堤柳十分綠林花數點紅

衰榮人物異時序古今同百歲能餘幾寧容酒盞空
苑中啓事回偕宮詹陳丙齋張隨齋祭酒汪東
川學士沈東田閣學曹蓼懷諸前輩重游郊
外諸勝

三月看垂盡春光不可留朝中逢舊侶世外樂同
遊芳草鋪茵滿晴嵐遠黛浮陶情期選勝何處有丹
丘

其二

游
豫親王園亭

淮南林壑趣點綴勝仙源里巷通槐市園中列
賈肆亭臺妙
兔園柳邊溪水漫花外鼓聲喧時擊鼓
賽神木屑霏霏落如

聞叔寶言

其三 萬壽寺

古刹維新日崔嵬入紫霄鐘鏞鳴盛代時寺內巨鐘初懸人物認

前朝鐘係明永樂為姚廣孝少師造畫棟翬飛美銀鈎字未銷鐘上勒佛經係沈學士度書

一旬重到此勝地任逍遙

其四

偶逐羣公後啣杯太乙宮酒行瓊樹底人坐雪花中

時布席梨花下各致珍饈盛窮搜雅令工喬松何代物俯仰起

長風

紀事

有事 宜春苑爭驅白鼻騮月迎五夜客是夕月明如晝風送

一年花曙後大風就道鷄初喔迴鞭日未斜謝公絲竹妙逐

隊醉流霞

同年許時菴招同人集故大司空朱夫子花庄

即往展師墓

數載親師地春風憶絳紗亭臺遺舊業桃李自生花

華表人成鶴頰垣字作鴉四壁為俗筆所疥墓門重灑淚頭白剩

侯芭

直舍

直舍無良友憑誰破寂寥千秋黃卷在一枕黑甜消

磚影看遲日宮鴉識晚朝六街燈火亂歸去馬蹄遙
夜短

夜短鐘聲早驅車欲曙天鷄鳴牛屋下月掛鳳城邊
倦眼醒還睡疎星斷復連何如灌園子日出任高眠
入夏

客邸韶光駛風花異昔容經春朱萼少入夏綠陰濃
王粲鄉心切嵇康宦興慵家山何處好夢裡九芙蓉

雲間有九峰之勝

懷素岩太史

吾友何時覲悠然水一方非關多聚散直爲判行藏

浪
白髮需甘旨青春忘廟堂自慚貪釣餌衰老負滄

懷臨淮學博顧霍南

斗大臨淮縣談經得鄭虔千村高白浪一老困青氈
搦管花仍放長飢腹自便詞場同躍馬廿載愧先鞭
苑廬作

春去百花殘殘花獨細看雨來風轉緊山近氣尤寒
飛鳥投林際驚雷落座端那知炎夏日還怯客衣單
野望

薰風吹永晝景物望中清近野花無主沾衣絮有情

天高片雲去日射衆山明尚欲携樽酒深林聽鳥聲
倬直

倬直來何所安棲鵲有巢笑言隨過客粗糲任行庖
別苑青山隔長堤碧樹交
六龍停輦處卜築競誅
茅

懷同年吳曾傳

耆舊皆零落靈光獨儼然余方就傅日君已盛名年
蕃榻曾同被膺門獲比肩遙憐峰泖外千里隔雲烟
與徐安士

吾黨論英俊君真伏櫪駒座饒文舉客家有步兵厨
妙句吟無敵名花種幾株結交才弱冠各已白髭鬚
苑廬將歸遲曹蓼懷前輩詰朝至

深院獨徘徊朱簾對綠槐長繩牽日住少女妬花開
是日細酌香醪盡歸心曉箭催兩人同燕雁春去換秋
風作來

曉起

窗外誰驚喚朦朧倚枕聽披衣對明燭出戶戴殘星
鷄肋何時割馬蹄無日停一身攻萬事那得鬢長青
渠齋少司農招同館年友寓齋賞紫藤兼送周
礪岩就養盧龍別駕官舍

新構書齋好脩然勝若邪疏泉添澗水架竹覆藤花
曲徑藏窩小迴廊引月斜此中堪避世誰道是京
華

其二

雙眼何由豁言登百尺臺山光當檻落雲氣拂衣來
塵喜三條遠花憐萬朶開啣泥新燕子相喚日邊回

其三

布席良朋集歡呼對濁醪朱欄深院繞綠葉古槐高
似漆情逾密凌雲氣尚豪醉來相視笑短髮各蕭騷

其四

迎養潘輿至蘭堂話別時王祥真別駕陳寔有佳兒
灤水常烹鯉龍山對詠詩長安故人滿莫遣雁書遲

重陰

重陰四野合風勢響颼颼天氣俄晴雨衣裳雜夏秋
拂雲看石燕逐婦笑鳴鳩稍喜零壇應甘霖點綠疇

鳥雀

鳥雀喧廷尉公卿事子都世情多反覆老眼飽榮枯
香草林間遠閑雲嶺上孤好尋垂釣叟一艇縱江湖

張洗馬寄亭偕凌秋寅谷招集豐臺宛平相國
別墅看芍藥

名花何處有勝地傍山村每歲開紅藥憑君醉綠樽
投壺天欲笑客有投壺者對奕手能言客有圍棋者竟日平泉裡悠然可避喧

其二

臨風花窈窕入耳鳥綿蠻樹密消炎日墻低放遠山
賞心隨地得終歲幾人閑便欲攜衾枕連宵宿此間

其三

清晝鷓鴣集披襟眺遠郊玉壺携美酒珍饌出行庖
入夏添新景看花得故交不知貪賞處斜日掛林梢

其四

驀地輕雷動微風一院涼山和烟更翠花帶雨尤香
坐惜紅英落行看碧柳長復從塵市去清夢着雲莊
偕同館年友再集豐臺看芍藥

其二

綠野多紅藥尋芳愛日晴解衣藉草坐攜手踏花行
相得同昆弟寧知是友生肯令管與鮑千載擅高名
少日追歡地俄驚二十秋紅粧猶照眼白髮已盈頭
自惜開顏少應教秉燭遊舊時文酒伴惆悵幾山丘

悼彭瞻庭劉禹美
吳楞香諸君子

其三

天冶千重繞芬芳百畝開阿環桃作靨西子玉爲腮
簾捲窺雙燕庭涼蔭老槐如何桃洞裡不見阮郎來

盼于岳不至

其四

憶侍龍門日華堂對綺筵

合肥李座師曾招門下士看花張筵于此

笙歌留一醉

花草恨千年黃閣名空重青箱業尚傳惟餘二三子

對景欲潸然

早

二麥將枯候千村久旱時但聞風烈烈不見雨絲絲
天鼓虛聲早驪龍獨醒遲興雲笑兒唱蜥蜴爾何知

冬夜

冬夜衝寒起炎天觸熱歸由來通藉後都與養生違
戀棧情何極經霜髮已非飲河幸滿腹好采故山薇

赴苑直廬作

襪被甘泉去郊坰道路賒殊方重作客傑直小移家
筐筥盛三韭琴書共一車槐堂同虎觀淡薄舊生涯

五月朔

京國端陽近菁葱長綠蒲他鄉逢舊節比戶換新符
到眼風光麗驚心少壯徂龍舟因弔屈遺恨滿江湖
出郭

日出嚴城啟郊原
緩轡行花間
春色老草際
夏蟲鳴
渴驥爭流急
香車度柳輕
四時看不盡
風物美
神

京
報稱

報稱憂蚊負支吾
索米艱家貧
因久宦身老
想投閑
燕市塵千斛
吳江水一灣
采蘭向何所
望裡陸機山

離宮

車騎平明集離宮
景物和
天潢龍種異
虎士雀翎
多花底紛珠履
林間散玉珂
西山佳氣滿
鑾輅傍
巖阿

書懷

書卷饒真樂
香醪不待沽
人間大槐國
醉裡小蓬壺
秋月隨時有
春山入畫無
浮生逾半百
寧復問榮枯
過夕月壇

自昔崇禋祀
咸稱玉兔靈
粉墻隨月白
霜栢繞壇青
秋至祠官入
天災客騎停
年來趨
禁苑此地幾回
經

西郊

襟期郊外曠
城堞望邊賒
寶塢金莖直
飛樓舞鳳斜
丹青披遠嶂
鼓吹聽鳴蛙
昔見纔三戶
今來有萬家

仲夏 苑暑聽雨

簷雨忽潺湲閑聽獨倚欄雷驚雲外落山愛雨中看
着處氛埃淨眠時枕簟安渾疑商節至頓覺暮天寒
端午 苑廬作

地臘稱佳節淒涼是客居有誰共五日無路弔三閭
臂繫靈絲少舟看競渡虛泛蒲聊一醉獨枕到華胥

其二

時雨滂沱沛驚傳霹靂車綠添仙艾葉紅濕石榴花
水漲平疇失烟濃疊嶺遮雲霓渴雨月此日慰桑麻

午日

召滿漢大學士宴賞牡丹

令節傳 天綽元臣捧 帝觴 御筵羅鼎鼐國色

醉姚黃交泰甘霖渥是日久旱大雨思深續命長諸公均作揖

不用感沉湘

高粱橋

別苑城西路高粱景特饒水平青草岬柳暗赤欄橋
雉堞層城近蛾眉疊嶂遙往來成孔道冠蓋日聯鑣

晴

密雲連日晦雲豁頓開懷鳥語初晴樂山容沐雨佳
庭前欣綠樹陌上試青鞋肯逐行間蠹空將歲月

時直 苑暑

埋

客舍

雨餘人跡少客舍興如何對酒忘憂易看山得句多
雜花開小徑乾鵲語高柯好趣羲和駕難教永日過
送大司寇阮亭前輩展墓旋里

間氣鍾靈嶽高名動帝居能詩何水部曳履鄭尚

書月落趨天闕燈明出禁廬司寇入直南書房文人兼大

位振古有誰如

其二

請急陳詞切温綸下玉墀恐隨采藥去時司寇有疾先

剋入朝期命限五个月速來供職不必出缺素履朋僚重丹心

聖主知上稱司寇為人寧靜秋卿虛席待歸騎莫教遲

其三

觸熱驅長路承恩拜古丘高軒驚鳥雀湛露濕松

楸薜荔思初服漁樵問舊遊故鄉林壑在憶別幾經

秋

其四

自笑家鷄陋頻年溷鶴羣蓬池隨載筆柏府共論文

司寇與余同官翰苑復同事南司匡鼎願常解周郎酒易醺忽聽驪唱發柳

色驛亭分

北郊解齋

鳳蹕止郊禋追陪減從臣齋居殊百職

舊例

車駕不親郊內閣官不陪祀

晏起得三晨消夏芸編妙開襟竹葉新太常何足學
千古盜名人

復齋

逐隊還齋宿良宵對石渠風清 宮漏遠月浸畫簾

虛方澤明禋重元公襍被居來朝陪從去 鶴駕視

龍輿

時命東宮致祭

陪祀

報功崇后土主鬯 命春宮短至郊從北重光日

自東鸞旌侵曉露鳳管奏薰風矯首瑤壇上 前星

朗照中

長安道

立馬千門裡長安四望間道傍生綠樹郭外見青山

冠蓋交珂里風沙老客顏鄉音時到耳燕市雜吳關

其二

夾道連雲起高門向曉開今看衣錦出舊屬販繒來

陽翟爭奇貨文淵笑守財臯夔寧誦讀杜若省郎才

其三

濟濟 皇都會翩翩寶馬馳揮金挾彈客如玉賣珠

兒月是豪家占春惟闋苑知可憐窮巷士頽禿髮成
絲

其四

填門七貴盛樂事五侯多方羨人如柳俄嗟雀可羅
烏衣新紫燕阿鶩舊青娥榮落何嘗定滄江日夜波
孫樹峰少宗伯招同人飲寓齋

愛子幽棲地招朋卜晝時竹生蔣詡徑花繞右軍池
夙好圖書足閑情酒盞知琳瑯驚觸目酬唱有新詩

苑署午眠

出戶星初落平明禁籞回忙封紫泥發閑覓黑

甜來謝草池邊長江花筆底開午鷄驚蝶夢斗帳起
徘徊

張翰

張翰家難忘嵇生懶不堪一官古冀北十畝大江南
生計囊中減衰容鏡裡添遙憐申浦曲何日釣澄潭

山濤病

官拜 宮寮重蕭然陋巷居龐眉老顏駟渴疾困相
如僕有長鬚剩家僮竄去惟一老者存家無斗粟儲始知鷄肋味端的讓鱸魚

苑署大雨

長夏當晴霽鴉啼夕照殷雷催一霎雨雲沒萬重山
平野宜鷗鳥褰裳涉市闌殘花紅粉濕零落帶愁顏

懷蒼佩婚滇南

天末他鄉鳥卑棲想索居千山萬里道數載一行書
薄宦身難達高堂髮已疎昆明雲樹杳晨夕渺愁余
懷茹英僭

近爾居何所年來跡屢更無家憐快僭失母念孤甥
魚雁天邊字雲山別後情幾時同笑語剪燭夜窗明

與侄麟照

族望烏衣舊承家仗後賢竹林應我共玉樹愛君妍

琢句同荆壁揮毫滿蜀箋早諧痴叔願接武鳳池邊

懷同年金會公

伊昔同袍友天涯最憶君窮愁消大耋官位折高文
落月傷燕市冥鴻入楚雲別來逾一紀消息幾回聞

夏直

槐堂人散後磚影度如年赤日蒸炎氣蒼蠅攪欲眠
看雲龍尾外聽鳥鳳樓邊誰識幽閑况巖廊
別有天

辛巳重陽招同館年友集黑窰廠以陶然亭登
高五字爲韻

秋序逢佳節閑情屬我曹一樽同老友九日又登高
帽落風吹孟花開菊愛陶終年塵袞袞幾度向林臯

其二

雉堞層城迥周遭畫檻前斷雲連遠岫疎柳密寒烟
萸熟清秋節人添白髮年可憐憑眺處風物已蒼然

其三

粗糲招羣彥軒車半日停披荆尋古寺載酒得新亭

亭係江水部新構在慈悲菴後

淺渚殘蘆白明窗雜樹青縱談盤礴久相

對互忘形

其四

伊昔龍山會曾來最上層幾人成異物携手憶同登

粉壁尋詩句禪房見佛燈百年駒過隙龜鶴有誰能

追憶劉禹美彭文洽兩君子

其五

浮名成底事勝地且遊遨細酌黃花酒閑題赤棗糕
棋枰無定局宦海有驚濤漫說殘陽盡前林片月高

同人小集分賦雪獅

狡狴何處有忽向謝庭生似虎堆鹽就如麟琢玉成
善馳徒兀坐欲吼不聞聲豈是銅頭者能令百獸驚

其二

凝華神獸出疑自白狼遙脩尾形原異張牙氣亦驕
梁園眠皓月表巷立寒飈只恐陽和轉冰山一樣消
再咏雪獅

白澤憑誰肖雄姿勝畫圖落梅叢處見乘月看來無
似易吞全豹偏難傍煖爐最憐頭角露大約歲方徂
其二

聞是毛羣長形容迥不同色侵銀海浪貌賽玉花驄
已應千秋紀全資六出功何須更迎虎四野卜年豐

至日病中

伏枕顛毛改書雲物候同浮生蕉夢裡佳節藥鑪中

顏瘦貪杯綠窗寒愛日紅閑將殘曆展一歲又將終

尊香堂詩稿

雲間王九齡薛澱

五言排律

祝張西山夫子八十

崧嶽鍾人瑞羣推洛社英靈光今宿望閭苑早蜚聲
 鼎試牛刀割琴依石甑鳴含香趨畫省起草侍承明
 北闕恢珠網南天掛玉衡梗楠隨地植桃李向春榮
 已擷東吳秀俄看蜀道行勳隨岷嶠聳節比錦江清
 益部騰謳誦臨淄擁旆旌吏驚解綬去氓喜夾車迎
 令譽巖廊洽嘉猷岳牧成夔龍虛席佇雲壑拂衣

輕閑種門前柳時尋谷口鶯邀賓澆竹葉下箸得尊
羹不受簪纓縛何心燕雀爭取精吞沆瀣把臂狎彭
鏗自愧兒童歲曾叨月旦評操斤勞大匠錄艾作芳
蘅路隔江湖遠星催節序更中年登玉陛數載共
瑤京木屑隨風落襟期帶雪傾朱顏長者健白髮我
徒生繞砌瞻瓊樹稱觴沸鳳笙黃花晚節好鸞鶴滿
層城

送許山濤還揚州

囊粟愁方朔沉綿困長卿鈞天七日後淮海一帆行
身逐浮雲去官同敝屣輕驛程霜葉送水國野鷗迎

俯仰無長策漁樵有舊盟窗間隨蠹老蝸角任蠻爭
棋罷柯常爛門閑柳自生青山歸客興白首故人情
伊昔同袍契臨岐別酒傾雙魚千里隔斷雁九秋鳴
破寂裁詩數相思對月明夢中如識路夜夜到蕪城
寄耕岩

薊北雲峰峻淮南水驛長故人皆闕下之子獨滄
浪東髮稱竒器擣毫早擅場青霄看鵲起紫禁沐
龍光已擢螭坳上還隨鳳輦傍宴叨天府膳
花賜御蓮香東觀冰壺澈西湖鐵網張藥籠無馬
勃仕路有羊腸投杼言三至飄蓬水一方低徊辭上

國倉卒嘆空囊去即蛟龍窟遙憐鴛鴦行身疑墜淵
谷天意薄風霜世上青蠅滿懷間白壁滅簪纓仍
舊物桑梓豈投荒獨恨啼猿裡偏驚別鶴翔窮途愁
阮籍遺掛泣潘郎藥惜金丹少星催版築忙巢傾存
小鳳夢斷落高堂送日憑黃卷忘憂仗杜康悲懽隨
所遇得喪本何常峽歷瞿塘險春回黍谷陽賈生年
正少莫便弔三湘

萼香堂詩稿

雲間王九齡薛澱

七言律詩

送侍講彭夫子還蘓州

重游蓬觀甫經年拂袖飄然去志堅漫說相如工獻
賦不妨平子暫歸田木奴林屋千峰熟銀鯽吳江八
月鮮笑問東華騎馬客一帆爭似季鷹船

其二

駑馬曾蒙伯樂收追隨門下幾經秋先生閉戶成元
草弟子啣恩愧白頭五兩輕風催去鷁一樽爛雨話

離愁歸囊知有豐城劍清夜常看犯斗牛

夏至納言署中齋宿

官衙雲豁雨初晴寮友高談檠燭明石磬響隨銅漏

遠署鄰古寺銀臺風似玉堂清余由史官改授通參郊壇典重勞天蹕

喉舌材微愧月卿知是荐馨方澤後嘉禾徧野足

春耕

夏至前移寓京兆署齋宿用前韻酬勞漆園前

葦

北郊陪從喜常晴借榻齋居落日明五月盤浮朱李

熟雙槐庭滿綠陰清政騰畿甸推張敞謂吳匪菴京兆筆灑珠

璣讓馬卿謂漆園前輩薪積那須憂仕路故人幾許老躬耕

賀宛平閣師御賜曲江風度堂額

張公唐室早登庸勛業千年勒鼎鐘異代曲江誰伯

仲吾師聖相接夔龍旋乾每作三農雨借箸曾清萬

國烽共道庭蘭方奕葉若論鶴算指喬松

其二

清時殿陞慶明良御筆親揮翰墨香閨苑雲消驚

鳳落槐堂日出見龍翔崔魏閭闔奎光爛沐浴江

河聖澤長試問開元張子壽蒙恩曾否拜天章

送宮允尤謹庸假還

閉門京洛擁書城木榻湘簾夏日清累月朝緣多
病免新詩錦為捉襟成謹庸近刻多索米之嘆從容儲禁聲華重
檢點歸裝襍被輕誰似鳳池堂構美閑依鳩杖話承
明

朝議晚歸限韻與同年江補齋

跨馬趨朝趁晚霞仰瞻雙闕五雲遮知人衆競
推宸鑒聚訟看如理亂麻喉舌濫竽慚竊祿戟門
吹角想排衙日斜方逐鷓行散歸取青銅問酒家

其二

丰標天半爛朱霞幾載高山望裏遮駑馬舊曾欣附

驥孤蓬今復幸生麻陳雷意氣元同調屈宋文章好
作衙客邸閒官塵累少看花頻擬坐君家

許時庵招同年集故大司空朱夫子別業即往
展師墓有作率和其韻

夫子仙踪不可望鳳城南去剩柴桑亭臺猶是追歡
地人世終無却老方松掩墓門空九棘鶴歸華表隔
千霜含悽獨對乘龍客時夫子令坦田荆巖前輩偕行長養真慚玉笋行

題通政勞漆園前輩畫蘭卷即次原韻

芳蘭凜冽性難堪北地逢春吐欲含淑質慣題騷客
賦清香愛傍侍臣簪他年我訂空巖伴斯世君期隻

手擔寂寞援琴成雅操秋風又見鴈將南

與汪我長

高名藝苑久嶙峋宦拙偏逢侘傺辰蕙苴空懷銷骨恨泥塗誰是脫驂人興來綵筆間題句歸去秋江穩釣綸萍水薊門纔把袂他時矯首隔松筠

送少廷尉顧詩城前輩南還

瀛洲槐柳拂春和夙昔隨君載筆過忽拜清卿辭鳳沼仝參末議坐鸞坡身游天路聲華盛夢繞鄉關別緒多老我重陪香案吏幾時攜手問烟

蘿時余復遷侍講學士

慈悲庵登高和孫庶子樹峰韻

霜濃薊苑正秋高老樹丹懸幾葉牢萬疊雲山清俗眼九重城郭帶平臯喜逢令節因花笑不學寒蟲向客號風猛奚須愁落帽杜陵短髮尚堪搔

其二

我有家園何處望自憐小草負東岡天橫雁字連雲沒風起蓴絲入夢長采菊每懷彭澤興當杯端讓次公狂留連酒罷歸途晚馬背垂垂掛夕陽

乙亥祈穀偕同年許侍讀時菴齋宿翰林院

齋居蓬島集儒官月白鐙青坐夜闌只為三農需玉

粒遂勞 萬乘禮瑤壇銅壺水向簷前滴水署風添
雪後寒何幸一枝同宿處十年重對舊鷓鴣時余由通政復還翰苑

祈穀陪祀大雪

燈燼祠壇曙色微鴛行鵠立望 龍旂嘉禾穗卜千
莖秀瑞雪花先六出飛樂舞脩陳前代物寒威偏犯
侍臣衣禮成栢絮松陰滿璧月光中萬騎歸

春享 太廟陪祀

報本 天心恪紹庭肅將時享有常經几筵九獻升
馨速水木三春感露零 丹陛雪留香粉白闕宮松
帶燎烟青豆籩將徹 靈旂杳鳳管鸞笙奏未停

元夜同年朱近菴招飲和友人韻

九衢火樹上層霄徹夜笙歌樂事饒一見傾懷惟舊
侶四時佳節是元宵縱談綺席珠頻落把酒蘭堂月
可招共道郎星春正好莫憑去鷁問江潮時朱子將歸江陰

乙亥元夕後一日飲兄瑁湖學士寓齋

氣暖階前雪色融良辰懽對畫堂中杯浮竹葉當筵
綠樹放銀花照眼紅促坐笑談迎璧月誰家綵管鬪
春風頻年兄弟愁南北京洛看燈此夕同

輓趙園菴侍御

招朋當日坐蘭堂笑語從容對舉觴方愛嵇康頽玉

妙豈期子敬遽琴亡選樓猶紀凌雲賦京輦徒留滿
路霜何事哭君腸欲斷遺孤六尺一空囊

送通政勞漆園前輩省覲

忽思定省理歸鞍惜別都亭柳未殘玉署十年稱後
進銀臺三月幸同官余在通政
僅三月詩投白雪閑曾和路入青
山羨獨看暫擲八騶成一笑人生難得是承歡

春杪宋比部堅齋招同同館諸公集李園

彈指春光候漸闌尋芳偶過辟疆看窮年總被微官
縛好友能同幾日歡含笑花如紅粉面駐顏酒勝紫
金丹歸來欲寫笙歌盛愧乏江毫得句難

德清胡夫子招同署諸公再集李園

亭臺昨共一披襟此日追隨再盍簪座上賓朋皆舊
雨園中花木長新陰堂瞻綠野名猶在人去丹山路

已淡謂文勤
相公陶寫素稱絲竹妙當歌無那愧知音

張館師相國尊慈太夫人八十

鳴珂閥閱擅江東壽母康彊五福崇設悅堂前稱八
秩捧觴膝下有三公鸞封夙荷龍章渥畫省新添
寶樹叢况是仙源流澤遠蘭蓀又長鳳池中

其二

滿目氤氳繞瑞烟人間黃閣有真仙光分舜日春

暉永綵借堯裳舞袖鮮介壽駕行聯鶴蓋和羹環
饌列瓊筵夜來額手三台宿照耀長同寶婺懸

祝常院長尊人

輓輸幕府佐旌旄夙昔曾聞報 國勞赤管曉含
丹鳳闕青綾夜擁白雲曹權關澤並長淮遠解組名
隨列宿高最愛端居多樂事閑同王母雪冰桃

賀孫樹峰擢司成

詞曹十載仰儀刑碩德高名動漢庭翰墨

一人稱獨步生徒六館聽談經方壺身到窮幽勝湛露

恩濃醉醪孫子曾賜宴內苑曠代遭逢欣未艾朱衣又見引槐

廳

送閣學陸義山前輩致政還樵李

殊恩昨歲簡綸扉詎意飄然遽拂衣疏傅復生千
載後鑑湖寧待八旬歸漏殘酒醒無座夢秋入鱸香
有釣磯盛世辭榮良不易真教蓬觀益光輝

乙亥季秋偕錢亮工弟儼齋偕張茹英姪彤文

熹兒游西山諸勝

香山山有軒曰來青明神宗書今上賜龍飛二字

長安終歲困樊籠此日翻飛上碧空錦簇千林憑檻
外眉橫雙嶺落軒中迢迢目送霜天雁獵獵襟披碣

石風指點前朝存舊墨龍蛇爭似御題工

碧雲寺

內有明季大瑞墓甚壯麗

諸璫高塚枕禪關感慨填膺俯仰間已作長蛇吞善類復留朽骨玷名山碑題姓氏雲端立石琢驂騮草際閑此輩尚容全宅兆千秋何處說賢奸

退谷

孫公北海構亭其間吳祭酒梅邨作歌紀之

衰楊繫馬訪遺蹤百折林巒一徑通空谷眼前追鄭子孤亭身後屬揚雄烟濃映日山光綠樹老經霜柿葉紅太息梅邨詩句好欲吟風物愧雕蟲

卧佛寺

寺植娑羅樹二株是西域種

縱目雲峰興未闌留連野寺夕陽殘共疑古佛安眠久愈信羣生早覺難烟滅草隨香案長山陰風帶墻鈴寒娑羅亦是人間樹道自西方着意看

秘魔崖

崖前潭蟄大小青龍

勝地呼朋一駐車盧師曩日傍崖居神龍出沒潭何在秋葉丹黃畫不如路繞羣峰孤剎迥苔封斷碣累朝餘誰能頓解微官縛伐石誅茅此結廬

經石景山從浮梁渡渾河

撥雲覓徑更捫蘿萬仞崎嶇杖策過峭壁馬頭看石景奔流足底駭渾河地連絕塞峰形壯天入清秋暮

真香堂詩集
霽多得句不愁同調寡追攀晨夕有陰何

戒壇

飛泉夾道響泠泠千嶂千霄數里青過午客來探虎
口繞壇松怪作龍形雲開皓月林稍見風送晨鐘枕
上聽無那禪房才一宿軟紅明發負山靈

將遊潭柘阻雨先返

此去烟霞何所之高名潭柘十年思遊人已著尋山
屐造物偏教厄雨師遠近陰雲愁塞野去留羣鳥暫
分枝來秋定作諸公繼莫笑探奇我獨遲

送陳乾齋侍讀扈駕出塞

親征扈 蹕擁旌旄 恩重寧知出塞勞

天子幄前揮翰墨文人馬上便弓刀風生瀚海欺裘薄
山接祁連積雪高指日功成聽凱奏 御筵歸錫醉

蒲萄

夏至齋宿翰林院和韻荅彭師叔瞻庭

齋宿同來玉署中閑窗布席對晴空雙槐人種蓬萊
樹千葉庭揚謝傅風院長桐城先生植兩槐於五雲多處永晝彎弧看射圃時有校射

者捷書飛騎賀 儲宮從今電掃邊烽淨萬里黃沙

白雉通是日聞塞外捷音

送劉退菴師伯奉使浙江便道省覲

駢駢京洛玉驄鳴臘盡風和碧草生丹鳳詔啣南

國遠紫萱花傍北堂明論心伯仲金樽滿選君劉夫子家居放眼

湖山畫舫輕我亦持旌三輔去關河惆悵各遄征時余奉

命告祀畿內古

帝園陵

深秋送別和韻作

薊門秋老送行驂藉甚猶聞說仲堪悞中一椎嗟博

浪無媒三載負書龕素交幾見青如柏我輩何妨白

滿簪獨恨大鵬垂翼去西風偏逐雁聲南

其二

俊傑從來善識時塞翁失馬漫生悲指揮如意惟高

位鄉里成名任小兒照眼琳琅詩易得滿懷塊壘酒

難治故園遙想東籬在黃菊花開對阿誰

深秋送別疊前韻

驂騮誰復賞吳驂却笑羣鷄爾輩堪量物勢交精玉

尺杜門冷宦住珠龕青箱業在終繩武黃菊開時且

盍簪最憶客程霜葉裏衝寒一騎向淮南

其二

桂花香落九秋時南鳥分飛動客悲錯認顏標無識

者寧馨王衍是佳兒眼前膠漆真虛語夢裏田園久

不治彼美天涯何處有芙蓉盈把欲貽誰

家獻夫貽菊賦謝

蠹魚芸閣是生涯寂寞渾同處士家獨酌無心傾白
墮多情有客餉黃花根移老圃凌霜直影傍寒窗浸
月斜吾族衣冠誰領袖如君物望稱琅邪

冬日招同年小集和韻荅朱近菴

開軒置酒對長空屑落清言滿座中昔日關山千里
別今宵燈火一樽同街傳警柝敲明月霜冷寒鴉叫
朔風欲和陽春慚絕調主盟騷雅仗羣公

丙子仲秋移疾荅伯兄瑁湖

健翮乘風集上林

時麟照姪
應京兆試

閑窗累日坐秋霖腰因善病

愁方減齒折佳音喜自深雅望仲容高北阮新篇郢
客惠南金庄桃回首兄先擲廿載空慚雪鬢侵

丙子初冬招同館年友對菊小飲分韻得十一

真賦後復依韻荅同人見示之什

偶陳鷄黍集嘉賓執手慇懃笑語頻黃菊對傾千斛
酒黑頭誰羨八騶人時有護
年資者和鳴鳳沼鴛行舊醉踏天
街月色新從此定期良會數肯教檇散作勞薪

其二

金馬由來類隱淪幾年薄宦老京塵花開陶令添知
已人遇周郎勝飲醇投矢笑驚天上電時客有
投壺者和羹香

憶水邊尊寒冬不用吹鄒律竹葉能生滿座春

和韻荅許山濤宮允

鍵戶京華咫尺遙偶逢高會不須招官貧退食歡筵
寡耳熱論心樂事饒寒谷盡思鑽火燧頭銜何意著
冰條人生踪跡隨飄梗且共秋花醉此宵

其二

冬來累日懶趨朝靜對閒窗寶篆消五夜蟾光垂
素練千門風葉響寒潮筵前綠酒他鄉美夢裏黃花
故國遙挑盡孤燈形影共細吟佳句度清宵

和韻荅孫樹峰祭酒

獨從雲漢識昭回緩步頻看紫禁來染翰鵝羣爭
欲購忘機鷹眼不生猜恩深翠管分天筆香動
紅蓮捧御杯孫子賜御用筆夏月賜宴暢春園異數遭逢君最盛崔巍東
閣望中開

其二

擬具壺觴竟日陪蓬門灑掃故人來花憐黃菊三秋
老髮畏青銅百計催坐膝漸隨棋局密笑顏爭傍燭
花開欲知眼底春消息驛使家園渴早梅

和韻荅許時菴侍讀

天清小院淨烟氛折柬空邀倍憶君良夜冠裳閑裏

聚故人形影病中分花連書幌勾新月風送霜鐘入
暮雲此日忝稱金石友他年還結鷺鷗羣

其二

詞場十載騁雄文玉尺頻操月旦分新向燕臺收李
郭十月許子
主武闈試舊傳吳會識機雲許子曾督
學江南當官共仰丰標峻高
枕能消俗累紛霜後幾人同菊傲蘭堂時過挹清芬

和韻荅吳匪菴通政

乾坤何處問滄洲行樂還須掛杖頭吳地金鼈惟我
有室人斗酒爲君謀登朝汲黯薪成宦作賦潘郎
鬢已秋最愛羣賢咸入座蘭亭彷彿楔重脩

其二

歲晚俄驚節序流三年京國復同遊鷓鴣毛落風偏
勁蘆荻花殘露未收魚涸自多江海志鳳饑肯有稻
梁謀狂來遣興憑毫素千首吟成萬事休

和韻荅家渠齋罔卿

上林共借一枝安憶舊微吟歲漸闌魚腹怪傳書信
杳山陽愁聽笛聲寒謂請假及弃
世諸君子放懷阮籍耽佳釀垂白

揚雄耐冷官身外浮雲君莫問百年人事幾悲懽

其二

塵勞終歲會俱難得暇招邀解獨嘆卜夜媿無金谷

酒迎賓忘著鹿皮冠聲喧櫪馬驚窗外屋小花枝逼
座端披拂和風談笑裏燕山十月不知寒

和韻荅阮于岳通政

烏皮爲几石爲屏促席寒燈徹夜青酒到阮公應盡
醉座逢荀令自流馨風塵孰辨牛溲濁雲壑常思鶴
夢醒十載升朝成底用驚看兩鬢各星星

其二

腐儒藿食少腥鯖對客何妨土作劔天祿共分劉向
火燕然誰勒漢家銘時用兵塞外人從碧落瞻卿月光射蓬
門會德星况爾臺端馳譽久至今姓氏播松廳

和韻荅彭師叔瞻庭侍講

詞館論文籍指迷瓊瑤時惠寫鶯溪巖廊此日同
鳴珮林壑他年獨杖藜城漏暗催銀箭永簾鈎斜掛
玉繩低來朝又聽鷄人去天上鑪烟滿袖攜

其二

驥首雲程日未西彩鸞何事嘆鷄棲九霄身傍螭
坳立三唱名傳虎榜題彭字第三人及第援筆文章裁錦繡論交
意氣吐虹霓宦遊無過樽前樂莫惜相逢醉似泥

和韻荅劉後齋通政

幸厠羣仙笑獨頑敢云曼倩寄人寰遙空南去聞征

雁爽氣西來落曉鬢千載陳雷真似漆八公詞賦並
稱山得天自分無多事剩有幽閒福未慳

其二

獻納階崇九列班清風宛在玉堂間漫言世上麤官
樂且醉樽前細菊斑愧我句無黃絹巧愛君心似白
雲閒論交自昔荆榛遠滿室芝蘭不用刪

和韻荅胡抑齋宮允

十年簪筆侍金坡冷宦門庭見雀羅舊好松筠凌雨
雪新篇珠玉鬪隋和家寒粗糲尋常設日午衣冠絡
繹過共聽丁丁歌伐木一羣好鳥樂高柯

其二

鹿鹿風塵洛下過迢迢鄉夢繞烟蘿釣魚灘畔啼黃
鳥載酒亭邊長綠莎蓬華回思同學少鷓鴣猶喜素
心多當杯不盡飛揚志顧影其如短髮何

和韻荅張景峰侍講

萍踪南北累年遠薊苑重遊共紫微攜酒對花黃
菊瘦經秋入饌鱖魚肥到來賭墅棋誰敵別後橫琴
手獨揮

張子善
琴奕

一歲歡呼能有幾晨鐘未動漫言歸

其二

平生林水願難違小草蓬池興漸微辛苦一官成老

大優游五鼎任輕肥每逢朋舊懽情淡間擁圖書俗
慮揮更有數枝殘菊在歲寒舍此我安歸

和韻荅史耕岩學士

香殘叢桂望淮南寒夜雲濃月半含五柳秋來多愛
菊二疏歸後少投簪忘機海上思鷗狎高枕槐陰笑
蟻酣搔首西山橫黛好幾時雙屐共君探

其二

作宦嵇康信不堪看花載酒舊曾諳入林何止賢人
七傍竹頻開客徑三藝苑蠶叢須共闢仕途虎穴敢
輕援良辰無那駒陰駛好語羲和一駐驂

和韻荅沈樂存侍御

追隨蘭譜十年餘意氣君纔弱冠初家本烏程頻中
酒才同沈約愛藏書柏臺霜後鷹將擊綵筆花明錦
不如何似羈棲三島客一官踪跡類枯魚

其二

相逢把臂一軒渠痛飲寧知髻已疎翠箔暫因霜月
捲黃花還傍夜筵舒戲爭楸局搖紅蠟仰視寒星動
碧虛負郭若教生計足五湖南去有茅廬

冬日偕茹英攜幼甥南還賦別

世路從來作客勞狂瀾曾見出輕舸已知鑄錯真無

鐵欲得亡羊尚補牢愁對綠樽花下別歸看紅樹雪中高丈夫虎變誰能測拭目雲霄振羽毛

其二

索米京華幾度秋閑看竹馬慰淹留嚴冬忽送孤甥去老淚重因愛女流余第三女已歿母失啼號雛燕切夜深風雨殞宮愁年來多少傷懷事欲問天公恨莫由

至日懷同年孫鞠思中翰

偶寫鸞箋問索居興公懷抱近何如別來風雨人空憶客裏星霜歲又除縱飲好尋千日酒閒官同老一編書隆冬莫訝寒威勁早見光添弱線初

送少司馬李厚菴前輩視學京畿

先生物望壓巖廊勁節千尋百鍊鋼總爲作人崇輦轂遂煩司馬辨驪黃襟懷坐映冰霜皎桃李春含雨露香暫借國工操玉尺經綸佇看補垂裳

其二

追隨夙昔共蓬壺幾載棲遲弱羽孤大造不言成草木允鱗終自感江湖扶風經授千秋業元禮人欽一代模計日乘軺春正好梗楠手植滿皇都

送憲副薛華麓之淮揚任

新膺岳牧出天閭春晝茅齋泛羽觴九帟高門欣對

宇

薛子居與小寓相對

五茸先世話同鄉

薛子祖籍華亭

驪駒唱雜鶯歌好淮

浦旗翻柳帶長到日寄聲吳季子會須早趣舍人裝

謂同年吳宮允鶴臯

花朝同人集劉後齋潭西草堂即以潭西二字

為韻

鳳城柳色綠氤氳縱目憑軒俯碧潭二月春光還薊

北一年花事負江南囊空久客頭全秃燭跋狂言酒

半酣眼底黃鸝聲漸好相携出郭有雙柑

其二

知君雅意樂幽棲傍水門庭類灤西懷友句投青玉

案登臺身上碧雲梯羣雛竹下鳴皆鳳

後齋有五賢郎

妙義窗

間語是鷄頌酒伯倫寧獨醉招邀時見百壺携

其三

經旬抱病懶朝參為愛芳辰駕兩驂綺陌又看花爛

熳雕梁旋聽燕呢喃論詩匡鼎頗能解對局支公手

善談無那金吾催客早空留新月印澄潭

時嚴夜禁

其四

蘭堂分手玉驄嘶竟日留連客夢迷座上高賢無白

眼樽前佳釀有紅泥樹花止合隨風墜春鳥何須作

意啼處世每思三益友卜居擬住屋東西

丁丑暮春偕友人至摩訶菴看花并歷元福宮
諸勝

平明結隊出郊坰並坐籃輿掛玉瓶林下看花千樹
白天邊對酒一峰青流光羲馭無停策高塚苔痕有
舊銘摩訶菴有先朝古墓春色眼前須共賞百年簪組總浮萍

其二

纔向禪房聽午鐘好尋芳徑一從容陶園問柳隨僧
去謝屐穿花驀地逢遇桐城張大宗伯暨鹵臣前輩於花下駐足笑言看吐玉將
車少長羨成龍風塵無限京華客閉戶空教綠樹濃

其三

青鞋信步興何窮覽物千秋俯仰中周鼎已移留供
佛元福宮香爐係宣德年物秦官雖老尚生風殿前有古松銅驢神肖名工寫
有一驢係宣銅野雀聲喧古殿空相對不知盤礴久夕陽斜逗
隔林紅

其四

得閑行樂是生涯折柳臨風插鬢斜望裡有山難上
馬醉中逢寺更尋花貪游不管春城鑰解渴還烹鶴
頂茶歸路尚遙徒御促到來門巷已昏鴉

復偕友人郊游至摩訶菴

千株仙杏爛成霞曾向芳郊駕酒車塵市住來才幾

日園林重到已無花解衣共進青精飯縱目還驅白
鼻騮賴有丁香憐舊識一枝如雪殿春華

再觀元福宮宣德銅驢

細看長耳妙通神金勒雕鞍恰稱身入冶幾煩鎔鍊
手試騎曾墜太平人斑斕寶鼎原多贗物色名駒自
有真好逐飛黃歸內廐漫停古院溷風塵

昌運宮訪松

尋松幾使馬蹄穿忽遇虬龍隱洞天仰面幹凌千尺
外問年人話六朝前道人云松係六朝以上物地幽不受紅塵玷色翠
偏宜白鶴眠瓊觀漸看成蔓草惟留古木自寒烟

萬壽寺看鐘

巨鐘露處中外勒佛經據寺僧云有雌雄各一流寇將入作泣聲既而鐘鎔一移置寺內其說與日下

舊聞所載異

聞說蓬萊水易乾華鐘夙昔動長安俄從灰劫逃秦
火曾學金人泣漢盤影作離鸞聲久歇霜侵貝葉字
將殘廢興自古尋常事棘裡銅駝好共看

祝孫赤崖七十

讀書何必珥貂蟬但使聲名徹九天枚叟兔園游甚

樂孫子為藩邸上客

管寧木榻坐曾穿

舊客遼東

一枝人作歸林鳥百箇

囊惟掛杖錢聞道七旬殊矍鑠看山時放孝廉船

禮闈後送同年廖越荃南旋

杜默文章李賀詩高名十載動 京師人如白璧誰

知者天遣黃楊厄閏時時閏三月燕市分襟花滿眼吳江歸

棹柳成絲春殘不用嗟搖落桂苑新添玉樹枝去秋賢郎獲雋

合肥相國李夫子招飲

綸扉端藉濟時才夫子從容陟上台黼黻山龍勤補
袞酸醎寶鼎善調梅綵毫得句金聲擲花榭彈棋玉
漏催更愛蓬池珠樹美菁葱百尺映三槐

其二

崔巍邸第禁城闈日晚鳴騶出 紫宸倒屣每迎高
士轍啣杯容吐相公茵名懸泰岱人難及座滿春風

客易親延攬誰開東閣待竭來盛事說平津

其三

暮春風色近南薰御陌爭看騎似雲北海樽罍清晝

設彭宣絲竹後堂聞六時漏滴鐘能辨齋中有鐘自鳴百和香

濃樹不分置百花開徧一室酪酏莫教良會散西山無那送斜曛

其四

雲亭問字屢經過化雨欣承笑語和元老秉鈞黃閣

重門生對酒白頭多聽歌竊喜陪珠履鳴珮同時上

玉坡十載巾箱楊氏雀啣花莫報愧蹉跎

張景峰招同人雨中集容膝園

忽聽階除滴瀝聲披襟瀟灑葛衣輕
風吹岩谷春潮湧雨歇園亭夏木清
綠蟻芳樽堪避世白頭老友自多情
羣居誰識嚶鳴樂烏鵲枝間話晚晴

其二

暮靄閑雲覆草堂松扉花逕繞迴廊
濃陰喬木生新葉竒石平泉剩舊莊

園係故相國高陽別業

對酒何殊南面樂臨風

真愛北窗涼君家兄弟皆鸞鳳傾蓋今方識景陽

時張

子令弟在座

送彭瞻庭師叔讀禮南旋

忽聞腸斷蓼莪篇分手春光欲暮天
寒食對花憐百

五長途衝雪恨三千

時遇風雪

庭萱落盡風驚木烏鳥啼殘

月滿船我亦素車曾去國十年回首一潸然

與同年朱近菴工部

文章夙昔藝林知對客温然白璧姿
名噪河陽曾作令官居水部自能詩
雲衢步忝飛黃後縞帶交從短褐時
比屋即今欣慰尺肯教石友負金卮

時寓舍與朱子比鄰

禮闈後送同年沈秩庭之洛中

尋君幾度到禪房執手俄添別恨長
不分卞和空向楚何妨司馬暫游梁
津亭柳暗侵衣綠野店花飛撲酒香
回憶秋風追驥足自憐廿載鬢先蒼

同年許時菴席上送奉天少京兆余念劬歸養
分韻得行字風字

金鞭欲拂彩衣輕置酒高齋送客行養勝仲由惟負
米書傳李密再陳情倚閭八十思游子歸夢三千切
旅程到日含飴談樂事蘭房新聽鳳雛鳴時余子有育麟之喜

其二

長天春盡滿歸鴻好捲湘簾坐晚風王粲詩篇慚鄴
下管寧景物熟遼東座逢石友傾杯綠筵爲金吾斷

蠟紅時嚴夜禁况是周郎相繼別他時櫻筍幾人同時周礪岩將往山左

疊行字韻

溪山深處掉頭行卿月長隨愛日明調膳陝蘭春自
采寧親暑枕扇來清屋邊料有慈烏集林際還看孝
笋生閑釣鏡湖雙鯉躍尺書能不念瑤京

疊風字韻

宦游廿載逐飄蓬之子心期藝黍同今送老萊依白
髮自慚寸草負蒼穹承顏樂在三公上執手愁分一
席中若問薊門相憶處時從天姥想高風

送大司寇翁鐵菴前輩致政旋里

驚代雄文擅兩都乘時經國展訃謨三年曳履登
天府一疏投簪乞鑑湖祖道共傳供張滿買山應笑

橐金無于公世德丹書種鵲起行看接鳳雛

其二

千尋共仰李膺門倒屣時承色笑溫驥逐西清稱後
隊筵開北海醉芳樽津亭掛席鷗迎棹花榭鳴琴月
滿村別後臨風懷謝傅東山消息託金昆

時令弟林一在都

春日招盧素公小飲賦詩見贈次韻荅之

雅性從來狎蠹魚雄文江海鬪相如凌雲已作高秋
鶚失路聊乘下澤車匣底龍吟三尺劍池邊鷺換數
行書新詩更似陽春絕手劈蠻箋一起予

其二

閏年春氣抵殘冬招友寒厨問釣筒茶灶煖烹楊柳
火玉瓶香散杏花風

時案間
供杏花

眼青端爲逢嘉客酒綠何

須憶射洪共信霜蹄成汗血金臺還見馬羣空

初夏偶作和韻荅伯兄

閉關都市謝塵喧對酒空懷上若村高枕晝長聞雀
語閑堦雨後長苔痕神仙蠹飽千秋字槐柳人齊七
貴門自愛蓬池成止水不隨宦海日瀾翻

其二

天道循環寒復暑碁枰得失定誰雄馬頭忙過千官
日牛背閑吹一笛風應節朱櫻來上苑插瓶紅藥媚

雕櫳細思新息真多事垂老猶矜矍鑠翁

贈同年錢再亭通政

閑曹幾聽鳳城鐘興至蘭堂杖策從壯歲同
朝俄白首素交投分托青松人瞻鴈序天邊翼句占湘靈
夢裡峰知是銀臺霄漢上來朝獻納有囊封
丁丑武會試闈中奉贈沁州吳大司寇即次原

韻

先生官領白雲司中外咸欽曳履時拜
命大廷持玉尺掄材小草附瓊枝虛堂捲幔閑同坐清晝論文
夜不辭郢客拈毫成絕唱陽春難和愧吟詩

疊韻再成二律

禮闈校士忝曾司

乙丑曾與分校

春草秋風又一時緩步空階

看素月靜聞乾鵲噪寒枝青萍方試非常器黃絹誰
題絕妙辭飛將塵埃湏努力凱旋杖杜正歌詩

凱入朝

其二

遴材鉅典集諸司列棘森嚴鎖院時古砌霜凋青草
色夜窗風撼綠槐枝院內有古槐一株躬操文柄慚無補睡借香
醪醉莫辭好向虎頭尋彩筆景宗競病雅能詩

疊韻贈同考諸君

彼此持衡各有司肯欺幽獨負 明時欲教騏驥騰
千里暫喜鷓鴣鸞聚一枝月旦人倫公等擅冬烘頭腦
我何辭不妨穎禿丹黃日乘興還期互詠詩

附沁州先生原唱

丁丑九月再典武闈偶成

一年兩竊鑑衡司正是修文偃武時春霰草芽青
映戶秋風槐葉冷依枝同人釋卷言兵事多士歆
弓作令辭黼黻太平真盛遇千城曾可入新詩

十六夜疊韻再成二律

歷歷更籌聽所司月明風靜夢回時詰朝應識崑

山玉此夜遙瞻桂樹枝禮樂成經原締武孫吳名
法亦修辭浮雲一點看無處閒步中庭自詠詩

南北糊名屬有司莫驚珠璧暗投時驪黃牝牡難
憑色鸞鶴鷓鴣豈共枝陰雨興關平治理大風歌
擅古今辭綢繆猛士知誰是壽考欣聞棫櫟詩

用前韻簡同考諸君

諸公衮衮限曹司何幸風流聚一時傾倒共呼桑
落酒品題各占桂林枝鐘聲曉色開燕市木葉秋
風逼楚辭清靜鎖闌多韻事公餘覓紙漫成詩
顧太夫子有家藏墨蹟失去復還賦贈

文敏千秋墨寶傳誰從鄴架竊瑤箋驚同印報中書
失喜勝珠看合浦旋襖帖賺歸多妙術玉簪完續有
竒緣登仙不似長康畫徒對空樹意惘然
詔百官聚觀俘獲噶爾丹之子於 午門和伯兄韻
天王神武誓平戎電掃全資戰伐功肯縱長鯨游釜底
先探完卵覆巢中 丹墀望去雕題異黃口牽來圜
豕同從此窮荒歸禹服專車旋覩戮防風

送高掌詹淡人前輩乞養還平湖

奉親賜第傍 宸居鄉思慈闈切舊廬一疏陳情辭
魏闕八驕歸路捧潘輿舞衣堂上頻娛綵調膳江干

自釣魚此樂三公真不易古來純孝有誰如

其二

夙沐 恩波渤海寬幾年鳴珮侍金鑾屢從絕塞宜
增秩乞退 温綸反拜官盛代名儒登 御幄 承
華碩輔重宮端千秋一德今還有莫道明良際會難

其三

鴻業全憑寸管裁

至尊親嘆馬卿才縹囊書識三墳上温室身經廿載來
日暖北堂烏鳥去風吹南浦木蘭開名園春色應先
到 紫禁恩光徧綠苔

其四

高賢往往樂江湖鶴髮誰將玉杖扶
拂袖陶潛徒愛菊逢秋張翰但思鱸
他年鐘鼎勲方盛此日君親願不孤
獨是離群愁片羽燕山越水樹模糊

臘月奉送京江相國張館師省覲

元老陳情向紫微

至尊恩許覲庭闈春秋八秩高堂健
定省三公振古稀

金鉉調來供寶膳山龍補就戲斑衣
慶門盛事傾朝艷不數尋常晝錦歸

其二

跨馬星言別廟堂都門時序逼春陽
紗籠色映

奎章麗瀕行賜金剛經御書萱草光
添佛日長夾道爭看迎綉袞

承歡歸及捧椒觴眷懷無那

皇情切纔識家園又趣裝

宛平閣師招集豐臺別墅讌賞芍藥賦謝

逐隊芳辰奉笑歡停騶卜晝共盤桓
庭前嘉樹垂陰遍墻外名山入座看
鼎鼎饌陳青玉案臙脂花繞赤欄杆
五侯爭艷平泉勝欲假蓬壺一日難

其二

湘簾高捲八牕通綽約嬌姿面面紅
注玉酒宜千日

醉開筵人坐萬花叢香侵荀令衣常滿色鬪天孫綉
未工更愛歌喉珠一串隨風散落錦堂中

其三

繁葩朱夏競芳菲芍藥由來盛 帝畿相國園偏郊
外有遊人花嘆眼中稀帶圍瑞早占黃閣仙種根原
託 紫微滿院雲霞看不盡賞心到此竟忘歸

其四

雲林風日喜晴明既醉還教弄玉笙司馬有園空獨
樂孔公對客自多情烽烟消盡資籌策魚水歡深注
老成弱草竊慚蒙澤久也隨紅藥殿群英

送中齋叔移家金陵

簪纓族望冠金臺忽漫移居畫舫開白下城高流寓
衆烏衣人自渡江來山川六代存遺蹟詞賦千秋待
逸才世澤琅琊淮共遠南天應復長三槐

送明府家令詒之銅仁任

千山深處是銅仁匹馬長驅萬里塵天下親民惟縣
令古來遠宦半文人地同勾漏丹砂妙政識中牟野
雉馴聞說甘泉堪釀酒蠻花滿眼醉芳辰

送趙和千督學滇南

仙郎幾載侍 龍顏忽捧 天書霄漢間旌節曉辭

丹鳳闕參苓秋采碧鷄山含香望重傳三署問字人
看到百蠻會向點蒼閑縱目一輪卿月照燕關

題總憲蔣裕菴前輩家慶圖

靈光夙望 兩朝餘矍鑠精神鶴不如共說周昌才
佩印俄看疏傅已懸車鷄雛產自丹山衆鴻案懽同
白首居尤愛林棲圖畫好千章花木一床書

送同年沈樂存侍御視鹺兩粵

執簡常趨 玉殿中朝陽嶽嶽久生風傅岩先試調
梅用渭叟方成煮海功獬豸冠邊窺綠鬢同館中沈子年最少豺狼
嶺外避青驄寂寥誰似芸臺友徒作人間食字蟲

其二

乘軺使者問南荒繡服晨飄滿路霜白雪波熬炎夏
積紅衣果擘荔枝香風清烏府時敲句月吐羊城獨
舉觴他日賓朋逢勝會愁看千疊嶺雲長

送郡守許蓼齋之黃州任

分符千里古諸侯地控西陵屬上游赤壁月高宜載
酒黃岡竹暗好登樓禁寬夜火與人誦稻熟和風水
國秋出牧定知崇禮教使君家世本瀛洲尊人及令叔俱起家常吉

納言勞書升前輩乙亥育麟今四歲矣以竹馬

紀年圖索題賦贈

真香堂詩集
醴泉誰道本無源英物由來產德門讓棗孔融剛四
歲授書思邈已千言手探比舍金鑲在色映連枝玉
樹繁此日一龍欣着膝他時萬里看騰騫

其二

丹穴當年彩鳳鳴聖童今聽說青睛名駒骨妙原殊
俗老蚌珠生倍覺明字取長庚同李白

賢郎小
字庚

美聯雙

璧繼徐卿誰能門內如君樂朝罷牽衣稚子迎

送侍衛許魯文歸娶許子係余丁丑所得士

去年相士棘闈間年少逢君玉筍班已借兔毫成燕
領旋從豹尾識龍顏鳴琴彩鳳將求侶拜手金

鑾乞暫還明歲桃夭春色好鹿車雙挽到燕關

送郡丞朱柯亭之襄陽任

襄陽風壤古今知佐郡星軺去莫遲覽勝好尋王粲
井攜樽還醉習家池訟庭政簡閑生草官閣朋來對
詠詩從此峴碑應再勒肯教叔子擅當時

送杜讓水南旋

萍踪契濶屢經春燕市相逢握手頻綠酒曾擽良夜
醉白頭同作倦游人卷中詩句無瑕璧名下風流有
角巾歸去妻孥彭澤好舊栽五柳幾枝新

壽太史陳緘菴尊人

下帷早歲對芸編
鵬翼相期上九天
忽學君苗焚筆
硯便隨梅尉隱
神仙龐眉人約
香山裡粥鼓身
依繡佛前况是
白頭偕德曜鳳
池玉樹正芳妍

恭詠

東宮白鹿畫扇

霜毫瑞鹿古來難
妙筆丹青寫素紈
祥比石麟天上
現色同玉兔月中
看安居臺囿容攸
伏得友萃蒿喜
共餐豈學野麋
緱嶺外但從林
壑自盤桓

季秋偕同署諸公游黑窰廠慈悲菴及烏龍潭
祝家園諸勝

麗景賓朋結伴游
崇岡百尺景偏幽
亭臺地闢仙山
勝江水部新構陶然亭蘆荻人疑水
國秋厨借寺中
因煖酒歌傳林
外恐驚鷗俄看
斜日城頭盡脫
帽飛觴樂未休

其二

傍庵突兀有瑤壇
躡屐相携次第看
古廟門荒無客
到深潭水黑有
龍蟠烟消香火
鑪全冷壁滿塵
埃字半殘俯仰
祇餘松柏在長
風蕭颯起悲湍

其三

祝氏園亭繫馬頻
重來僻地遠囂塵
閑尋風物猶前
日屢見池臺換
主人草閣水涼
宜入夏藥欄花
落尚

含春五湖亦有陶潛宅萍梗天涯想釣綸

同年姚華曾招同陳丙齋沈東田兩前輩黃崑

其圃胡芝山汪安公諸同館讌飲即次原韻

從容解帶散幽懷秉燭焚香坐竹齋客裏樽罍忘日

月卷中風物識江淮讀姚子游州經年玉署堪偕隱高議金

門未易排倘欲尋山攜手去捫蘿濟勝有芒鞋

送別駕龔節孫之錦州任

雄文五色鬪江毫累戰空經棘院勞買爵何傷司馬

賦出關應佩呂虔刀地饒紫氣千年壯雪覆青山六

月高料得邊城稀案牘官衙長日引松醪

戊寅歲除次大兄韻

忽聞臘鼓動燕山彈指光陰客裏閑但對紅椒傾綠

蟻那知青鏡改朱顏看人宦奪乾坤巧笑我心同鐵

石頑計日嬉游燈市盛與兄連騎月中還

已卯元旦 太和殿朝賀次兄學士瑁湖韻

龍袞欣瞻御紫宸元正同賀太平春坐聯 玉殿台

衡席時余與兄俱列班殿上捧 賜瓊漿禁衛人賜乳茶兄弟一時蒙顯

秩生成廿載荷洪鈞 朝回日午天街暖簫鼓千門

物色新

和韻送徐閣學華隱前輩致政還嘉禾

鴛湖一曲有漁磯久別溪山旅夢依博物共推張壯
武清吟獨愛謝元暉碧雲天外蜚鴻去黃葉村中駟
馬歸拂袖綸扉高卧穩鷄鳴不覺曉鐘微

其二

遂初賦就已投簪爲謝天恩到上林閭苑仰瞻三
島近奎章捧出五雲深謂賜御書萬鍾勿顧高人節一
飯瀕行

聖主

心

謂賜膳

竟日留連歸路晚昏鴉點點漏沉沉

其三

銀魚金殿久承恩碩望由來重北門纔向天

厨分玉食又從儲禁沐春温鴻篇寶翰優賢達東宮

賜睿筆

別苑羣書細討論

召至書房論古籍

身健歸田真樂事杖藜

閑看稻生孫

其四

董相曾聞束帛徵鷹揚藝苑擅多能湧泉妙思源難
竭扛鼎雄文筆可勝已給飛龍驤北闕何妨老圃
學東陵貽謀盛德傳家遠定見簪纓奕葉承

其五

詞館當年共校書每論今古一軒渠隨肩珥筆聞鐘
後退食聯鑣落日餘樗櫟常爲東觀客風雲早運北

滇魚玉臺近荷 承華賞孝穆遭逢恐不如

其六

未合懸車便引年 軟紅塵裡獨飄然 季鷹自欲思鱸
膾 彭澤何須種秫田 黃閣 彤庭留夙譽 浦鷗野鶴
續前緣 還家正值秋初老 蘆荻花開好放船

其七

傲裝南去別楓宸 霄漢無邊雨露新 賜翰盈箱爭

日麗趨 朝回首戴星晨 郵亭柳送青絲騎 山縣花

迎白髮親 時令嗣宰內丘將迎養任所 遙想烟巒蓬鵲繞 時憑官閣一

怡神

其八

紙價新詩貴 洛陽寧愁舊業海 田荒雲迷洞壑人 千
里露冷蒹葭水 一方燕月屋梁懸 客夢浙潮書信盼
江航可知 盛世崇耆碩 早駕安車輔

玉皇

贈同門卜一水侍御

杏林疇昔競飛鳴 膠漆相投得友生 千頃每欽黃叔
度 廿年同侍鄭康成 風飄咳吐珍珠落 雪作胸襟暑
月清 嶽立推君真御史 九衢驄馬看縱橫

季秋送宋久一還雲間

宋玉文章鬪彩霞萍踪晨夕共 京華扁舟獨聽三
秋雁別酒同看九日花劍佩龍泉光犯斗鱸香申浦
客還家閉門自理瑤琴趣流水聲中想伯牙

已卯 南郊陪祀偕副憲家桀齋齋宿署中賦
贈

春風雲路並騫騰屈指追隨廿載曾對榻共眠新栢

府焚膏還憶舊蓮燈余為庶常時與桀齋同館元龍豪氣看猶盛騎省

顛毛笑易增葭管將飛銀箭永清談寒夜雪霜澄

送劉海觀編脩出守揚州

帝咨侍從為蒼生交口才猷遍九卿總是漢庭崇牧

伯不妨太史去承明拂衣猶覺鑪烟滿夾道懸知竹

馬迎况復瀕行 天語切好將循績重蓬瀛劉子係九卿公舉

上諭云勉為好官母玷翰苑

張少司成寄亭招飲耕雲山房看牡丹分韻得

樽字

共尋魏紫訪閑門解帶歡呼促膝論三月好花惟此

日一年勝友幾開樽壇邊松鬣新陰長案上鷺羣舊

墨存見沈文恪公遺筆愛聽成連彈絕調聽天全曹鍊師彈琴不知歸路已黃昏

耕雲山房看牡丹和韻荅韓少宰慕廬前輩

著作名高李杜壇直教屈宋作衙官尋芳人戀三升

醞傾國花開百寶欄自喜青雲多石友欲消白髮少
金丹知君不識姚黃貴玉樹新從杏苑看先生哲嗣春闈初捷

次韻荅周礪岩

客裡相逢縱笑談良朋何意忽投簪時周子請急尊鱸夢落

三江水錦繡詩抽五色蠶仕路陰晴無日定名山事

業幾人擔他時林屋尋君處周子別業在洞庭醉卧青峰俯碧潭

庚辰夏至偕總憲吳廬前輩齋宿署中

明裡方澤重維虔陪從高賢五月天古柏烏啼門似

水小窗夢破日如年閑聽賭墅敲碁局遣興題詩託

綵箋漫拂殘碑論舊蹟百年世事久桑田院署係舊通政司碑記尚存

次韻荅同年呂星若侍御

新篇惠我寫吳綾老去交懽少壯曾鷄試牛刀知抱

負呂子起家縣令霜清柏府見風棱趨朝聯步瑤堦月校士

同挑棘院燈庚辰春呂子監試事與余同禮闈騰踏看君天路遠願從驥

尾學蒼蠅

與同年馬蘅原給諫

洛京數載共風塵旅邸相逢笑語親蘭譜論交曾獻

紵鸞坡集議每連茵壺觴重憶金陵酒花鳥閑撥

薊苑春太息同袍皆老大幾人雲海尚迷津謂廖越荃孔振玉諸子

與孫歌載歌載尊人子立太史余同年友也子立及第未幾即世後人寒素故篇中及之

椿庭夙昔是名流，桂苑秋風我共遊。
纔見淵雲推館閣，那知嵇阮便山丘。
良弓似續家聲美，喬木菁葱世澤留。
古道豈無羊舌在，相逢好與話窮愁。

送周鐵門之密雲任

累年作客滯京塵，此去漁陽墨綬新。
種柳陶公真傲吏，栽花潘令本詩人。
瓶中酒熟何妨醉，釜底魚生不厭貧。
退食遙知官舍樂，綵衣常傍白頭親。

送洗馬周礪岩請假還雲間

如椽妙筆冠西清

聖主崇儒識大名

周子瀕行上賜御筆諭云爾夙有各望者

三島客辭天祿

去五湖船載御書行，堤邊綠柳含愁折。
籬畔黃花帶笑迎，歸卧不須憂末疾。
壺中新煉九還成

其二

臨岐把酒強爲歡，况值秋高玉露寒。
同伴幾人零落易，時彭瞻庭吳楞香他鄉老友別離難。
世間蠻觸爭蝸角，天外江湖任釣竿。
聞說洞庭峰最妙，肯從縹緲望長安。

周子別業在包山

贈中翰桑子誠

半載同君住閩岑，相看冰雪是胸襟。
綠樽我愛公榮飲，紅藥人傳謝朓吟。
曉對彤庭星影落，夜聞清

禁漏聲沉閑來誰共消幽興獨向松窗弄玉琴

牧堂上人以庚辰除夕作見示次韻懷之

帝城冠蓋自繽紛暗裏韶光一夕分日暖西山消臘

雪鐘鳴北闕散春雲堆盤又見新椒好入夢頻驚

爆竹聞獨憶遠公蕭寺裡萍踪數載悵離羣

辛巳春會同年於錢京兆再亭寓齋

詞場少日附羣賢別後音塵各渺然黑髮已凋青鏡

裡綠樽重話白門年壬子冬大會 扶風人去愁空帳追憶簡夫子

子敬琴亡恨絕絃謂王天 彈指俄驚三十載幾回能得

共芳筵

集齋少司農惠茉莉二株昨歲集齋奉使督

河時曾以盆蘭見貽賦此並謝

茉莉移根自遠方名葩忽荷故人將笑簪潘髮偷年

少烹入濛茶滿頰香密葉疊成庭下翠冶容偏鬪晚

來粧試論玉骨誰能似應共瓊花壓衆芳

其二

愛君舊贈有芳蘭入夏開時百遍看此日幽香生葉

底當年彼美渺河干雲山不斷同心好京洛重逢

握手歡茉莉近來添勝侶頓教蓬戶滿琅玕

題陳陟齋給諫畫像

丰標嶽立重 朝端退食脩然面藥欄似玉秀含庭

下樹畫有賢 郎侍側連枝香動省中蘭陳子昆仲皆黃門卷 繪並頭盆蘭故云匡時抗疏傳

青瑣遣興閑吟寫素紈卷尾題 詩二章喜得三毫添道貌圖成

應向百城看

送曹崑宅之象州吏目任

薊門十月動征鑣拜 命何妨暫折腰意味一官鷄

肋薄關河萬里象山遙隻身犯雪趨荒裔衰柳和烟

折灞橋鸞鳳豈終棲枳棘上林他日看遷喬

贈川陝華總制

黑頭建節仰威名使相新承 寵命榮兩蜀風行通

劍閣三秦坐鎮作金城嘉賓入幕蓮常放良夜登樓

月正明何日故人瞻祭戟十年回首共西清華子曾同事 起居節

耳鳴愈後與王恂菴

閉戶支離卧浹旬耳邊蟬鬧避喧身倉公不假如神

手王笠將為畫字人座上笑言欣復辨筵前絲竹聽

還真誰知溷跡長安裡賣藥韓康是隱淪

病起與劉育萬

何人當代善岐黃愛爾聲名滿 帝鄉曾飲上池知

臟腑慣搜二豎到膏盲養身獨得長生訣濟世時投

續命湯自幸幾回逢妙手帶圍無恙沈郎強

送同年黃門慕見曉南旋

幾年鳴珮共班聯
白簡時聞闕下傳
欲脫錐囊稱利器
肯依梧省學寒蟬
都門木落隨歸鳥
茂苑花明好泛船
慕子家寓吳門此去窗間閑讀易
可知伯玉本高賢

慕子時年五十

蕙香堂詩稿

雲間王九齡薛澱

七言排律

寒食同人集孫樹峰墨雲堂用杜少陵清明排律韻

禁城旭日散寒烟
共訪張融岍上船
綠野紅桃新氣象
青樽白墮舊因緣
客中僚友閑相樂
鏡裡顛毛老自憐
律轉陽春知谷暖
官同冷節斷灰然
塞翁處世恒隨馬
趙壹能文值幾錢
漫道京華寒食好
萍踪鷄肋已三年

其二

但斟美酒自河東畫字奚須笑學聾投轄陳遵偏愛
 客清齋蘇晉漫談空時許山濤奉齋榆烟燧出風光改杏粥香
 調物候同仰視高堂懸御墨細吟佳句落江楓吳
 山花鳥酣歌外綿上龍蛇感慨中欲問踏青芳草路
 五湖心事負漁翁

萼香堂詩稿

雲間王九齡薛澂

五言絕句

讀史雜詠

仲華拜袞歲時甫逾二十多少封侯人其年不可及

其二

田竇爭結交輻輳門如市只緣賓客多天子為切齒

其三

至人神龍若學道取善全薰以香自燒龔生竟天年

其四

大俠通權門力能劫猛吏試看孫京兆氣索杜穉季
其五

據鞍矍鑠翁垂老志荷戈知止乃不殆傷哉馬伏波
其六

李雲生可捐董宣項不屈舉世效轅駒龍逢果俊物
其七

東京諸名士競與中官仇卓識弔闡父惟有一太丘
其八

寇來但圍棋寇退喜折屐浪得千秋名蒼生謝安石
其九

雁門有太守云是銅臭流若遇皇甫規可問雁美不
其十

馮衍稱奇才胸懷忝達士失意君臣間餘憤發妻子
其十一

我思仲長統著論垂高文如何求樂志翻作老參軍
其十二

馬融攻李固草奏附勢家世人誇絳帳吾惜白璧瑕
其十三

每嗤潘河陽慕勢遺後患望塵拜何人猶自稱拙宦
其十四

宋室長城壞道濟枉見收至今江上曲猶唱白浮鳩
其十五

竇姬遇代王貴幸衆莫及那知籍賜時悞置曾涕泣
其十六

叔度波千頃生平無一竒何期林宗輩嘖嘖牛醫兒
其十七

惡木高萬丈其陰不可依伯喈與茂先殺身空歔歔
其十八

太息漢宣帝霍氏殲一門覆宗固自取定策或有恩
其十九

田饒諷黃鵠平津厭故人所以嚴子陵掉頭還富春
其二十

衛青尚公主權勢傾天下誰知同衾人即是執鞭者

尊香堂詩稿

雲間王九齡薛澂

七言絕句

上元前四日宛平閣師招同家兄舍弟飲怡園
賦謝

玳瑁筵前燦綺霞
蘭膏奪目實堪誇
只緣相府春光
早火樹先開萬朶花

其二

殊恩元老錫龍章
御額新懸白玉堂
莫詫華鐙偏爛熳
薰天一半是奎光

堂懸曲江風
度御筆

其三
錦席周迴翡翠屏
秦青妙響遏雲停
後堂幸許彭宣入
徹夜笙歌倚醉聽

其四

玉漏迢迢樂意濃
園亭緩步一從容
兩行寶炬千尋直
快覩中天掛赤龍

其五

四顧光同不夜城
八方碁布若連營
駁車忽向林端發
動地驚聞霹靂聲

是夕烟火甚盛

其六

林岩宛轉曲廊通
不是平泉是閩風
逸興何須推謝傅
東山今在鳳城中

其七

天外娑羅似薄綃
良工巧製耀清宵
然時但得三台近
相送寧辭萬里遙

有燈似蟬翼製成自滇南來者

其八

珠簾高捲拂銀灣
滿座春風接笑顏
不用餘光穿壁借
自矜身在火城間

其九

元公十載秉洪鈞
龍馬精神鶴髮身
把酒月迎三五

夜調梅人樂八千春

其十

平津高閣近蓬萊
令序誰能逐隊來
何幸連根蒙雨露
一時共對九枝開

盤山拙菴上人
以遊五臺山記見示賦贈

聞說名巒傍蔚州
紅塵袞袞路悠悠
閑來一展臺山志
恍在清涼頂上遊

其二

驅車曩歲過盤山
搔首千峰縹緲間
已已經盤山
欲登不果
何日再經山下路
白雲深處扣禪關

相國合肥李夫子
廬墓有白燕雙集賦贈

曲江元老薦循陔
丙舍曾聞白雀哀
今日廬江雙燕子
如霜又為相公來

其二

夙昔星馳別禁闈
貞松賜額有光輝
可憐不見菁蔥色
獨聽呢喃淚濕衣

其三

黃閣承權奉板輿
晨昏常戲老萊裾
鷓鴣合是慈烏化
帶月還看傍倚廬

其四

小子重經薊苑春松楸回首隔風塵傳家漫道烏衣後慚愧當年誓墓人

題史耕岩學士下直圖

直廬高傍閬風巔坐校優游共列仙珥筆纔從南內

出窗間又自理瑤編

耕岩日直南書房

其二

十年聯步五雲居風采君猶識面初誰似留侯同好女慣從圯上讀竒書

麗雪崖前輩畫種竹圖肖像其中尊人年八十作歌題卷首

一株家有八千椿官閣清風染翠筠欲作延年方竹在高堂好寄杖朝人

其二

曩歲攜毫陟閬風郎星今見耀長空先生豈是張居士閉戶偏逃苦竹中

丁丑首春集阮于岳寓齋限賦踏燈詞

高齋折柬會良朋四望長空皓月澄老伴喜逢新歲酒遊人爭看上元燈

其二

每逢臘底想芳葩消息東風暖尚賒何意春來才一

日滿堂早發九枝花

是日係立春後一日

其三

迢迢清夜漏難終更放庭花十丈紅縱覽那知如堵
處忽驚霹靂到筵中

是夕有烟火

其四

五鳳城同不夜城元宵難遇是清明雨師解得都人
意不遣纖雲滓太清

其五

競樂新春景物妍紛紛接軫復駢肩千門火樹開紅
葢九陌行人踏翠鈿

其六

從來游手玉京多作戲燈前結隊過此輩何曾知稼
穡齊聲也學唱秧歌

其七

多少侯門列綺筵遙知光焰欲薰天十家傾盡中人
產止博蘭膏一夜然

其八

一鎧掩映四蹄輕壯士循環荷甲兵拭目早看烽燧
息免教鐵馬逐宵征

咏走馬鎧時有塞外之師

其九

人物雕鏤巧入神名工製作一番新自憐燈市三條
路十載看逾薊苑春

其十

賞盡銀花萬樹餘明星三五望中踈興闌歸向寒窗
坐剩有殘燈照讀書

康熙三十六年春二月

聖駕北征噶爾丹功成詩

鑾輅平明出九重旌旗搖曳瑞烟濃欲謀中外蒼

生計三度邊城駕六龍

其二

二月關山景物和鷹揚飛將擁雕戈烏知凱奏嬌歌
早春滿軍容細柳多

其三

服遠端湏仗帝猷躬巡遑問道途脩書生不識安
邊策臨發猶攀玉輦留言官留駕

其四

龍旂九仞拂雲高共望天兵似雨膏戰士風霆申
號令肯教編戶損秋毫禁騷擾

其五

虎旅長驅向紫臺定教絕塞淨纖埃揮矛何事勞推

轂七校

天王自將來

其六

軍興容易亟追呼國計經營倚廟謨何意周師方

薄伐翻聞漢詔特寬租

蠲租

其七

五花寶馬六鈞弓金鼓雷鳴氣象雄鼠賊聞聲應膽破熊羆萬隊出雲中

其八

興州城枕萬峰陰寂寞巖疆自古今忽覩山河生異

彩春來初幸翠華臨

其九

神謀天授少人知鋤惡難容醜類滋羽翼既摧成獨鳥欲逃增繳竟安之

其十

師行奚獨任堦整叅贊多資帷幄謀今日運籌皆聖斷不煩前箸借留侯

其十一

孽子擒來萬姓看一時雀躍動朝端思量小犢成何用饗士行當付大官

擒獲噶爾丹之子

其十二

一戰鯨鯢薙草同元克鼠竄賊巢空暫令狡兔潛林
外終見游魚熱鼎中

其十三

朔方夾道集蒼黔喜戴堯天雨露霑共挽六螭祈
日馭再迴陽景照窮簷邊民留駕

其十四

千載邊氓覲玉皇遭逢也欲仰奎光一從天
筆留題後草木皆含御墨香邊民懇賜御書

其十五

鑾輿北伐駐高峰此地嫫姚有舊蹤試向狼居胥上
望名山不數漢時封駐蹕狼居胥山

其十六

風送陽和雪窖温如雲解甲叩旌門無知縱與牛羊
匹也識天朝豢養恩賊衆投誠

其十七

熊羆兩路走銜枚餽軍中火急催滅寇欲酬朝食
志教倉早取萬箱來運餉

其十八

驚弓弱羽懾王師瓦解星離已不支勢似疾風吹

穽易決機制勝在乘時

其十九

買盈巨惡喪師徒束手倉皇一策無身在樊籠兵在

頸莫惟仰藥是良圖

鳴爾丹自殺

其二十

天殛克渠朝露休俄看敵國起同舟難驅豺虎窺秦

塞但送妻孥作楚囚

獻俘

其二十一

疇能先事即圖終遐邇咸寧 帝業雄迎刃盤根如

破竹總由成竹具

宸衷

其二十二

風清不聽鼓鼙聲疆場欣看寇壘平多少豺狼爭面

縛沿邊重築受降城

其二十三

貔貅百萬赴邊關者定從容振旅還欲識 功成高

幾許千尋請看賀蘭山

其二十四

行間將士盡投戈塞上農人舞復歌試問甲兵何處

洗靈州城外有黃河

其二十五

元惡鯨吞毒遠陬三驅大兕殪戈矛小藩從此欣相
保高枕恒無弱肉憂

其二十六

賣刀買犢自今年四海桑麻樂晏然北望龍庭歸版
籍田官直置過祁連

其二十七

雲開望裡戰塵收獻捷 皇朝錫宴優傾耳六軍歌
杖杜歡呼同飲月氏頭

其二十八

揮戈電擊復風馳朔野縱橫滿伏屍聞道妖狐梟首

後至今血色汚燕支

陣斬噶爾丹之妻

其二十九

投醪疇昔念如林粗糲均嘗 帝德深此日堯衢饒
鼓腹不孤

聖主一餐心

軍中御膳日止一餐

其三十

解渴千軍盼朔庭清流愛聽水泠泠即今九有成蒙
澤瀚海仙源合效靈

軍行乏水地湧甘泉

其三十一

青青曾說滿平原天賜芻供萬馬屯不是龍沙生茂

草那能苞蘖斷汲根

沙漠草生

其三十二

上駟寧無十二閑徒行昨歲歷千山昇平坐享蒙誰
賜即在

天王舉趾間

軍行
上時徒步

其三十三

回思邊野駐龍媒冬日寒雲黯不開任是雪花如席
大隨風曾拂御衣來

其三十四

間關行路古來難偃仰皆思竊晏安豈似

至尊親跋涉無分酷暑與祁寒

其三十五

窮荒峻嶺隔千層或謂羈縻且莫懲
宸斷不搖如
泰嶽壓來累卵果難勝

其三十六

水仙滄海弄波揚曾命樓船問土航近取天山來
作鐔彎弓豈但掛扶桑

平海寇

其三十七

掃清三逆版圖安朔塞新平四國歡搏虎山中擒或
易彈鷄天外落尤難

平三逆

其三十八

牽羊接踵拜 龍顏烽火全消指顧間
遠勝漢皇躬 耀武不逢一騎只空還

其三十九

龍韜變化動如神 指視驅馳聞外臣
虎拜告成叨 帝力安排彩筆畫麒麟

其四十

黃沙極日斷人烟 昭代聲靈撼八埏
每笑越裳矜 累譯直教禹貢闢山川

其四十一

其四十二

武成 天蹕入長安 童稚歌呼父老懽
虎隊鴛行皆 拜手黃旂紫蓋擁田鑾

其四十三

當官誰肯薄輕肥 屈指 皇衷簡在稀
欲獎冰清風 百執親停金勒 問胡威

聖駕凱旋日首 贊皇沁州張遂寧清節

其四十四

從官含笑騁驂騑 滿目長空紫氣浮
輦路人瞻 天日表鏡歌聲徹 鳳凰樓

其四十五

珠旗玉殿颺朝暉 入賀羣工拜紫微
收得窮猿隨百

獸 聖人萬歲坐垂衣

其四十五

祠壇升燎會纓簪 元后功同覆載深 七獻自邀

神鑒速安民良慰作君心 告祀 郊壇

其四十六

凱旋 九廟薦蘋蘩

聖祖居歆陟降存 遙想在天應色喜 皇圖累葉拓 神

孫 告祀 太廟

其四十七

定省 天心日夕懸 暫因戎馬隔山川 盡消鐵甲還

金闕玉冊親呈

聖母前

其四十八

垂紳鳴玉滿金闈 擬上鴻名頌 日躋管裡那能窺

帝德巍巍祇見與天齊 却上 尊號

其四十九

龍城鐵馬不聞嘶 湛露晨飄濕 紫泥五色雲中翔

木鳳千官 闕下聽金鷄 頌 詔

其五十

盛世丕基肯構崇 功成虔祀 寢園中 龍輿到處

狼烟淨佳氣橋山倍鬱葱

告祀
聖祖山陵

其五十一

鴻猷應示萬年餘金匱瑤編付石渠載筆只愁無妙
手蟠天勲業不勝書

其五十二

翠輦從容紫塞回端居閭闔九天開銀臺絡繹封章
滿萬國多因賀捷來

其五十三

鳥銜鳳綉出皇州昭告羣神祀事修已識要荒咸
震疊更看河嶽並懷柔

告祀嶽瀆

其五十四

昨歲陳牲闕里看今年又見命祠官 聖朝武事
連文教時有馨香拂杏壇

告祀闕里

其五十五

古帝明禋有舊章兵戈新喜偃沙場窮搜不覺龍荒
遠奮武真堪報百王

告祀古帝園陵

其五十六

擊壤謳歌四海寧共球絕域盡來庭 皇謨自具天
工妙看取欃槍作景星

其五十七

莫香堂詩集
除克喜愜 一人心脫劍雍容返禁林七德九功教
作舞薰風時節撫虞琴

其五十八

縹緲祥雲護 紫宮承平萬載罷從戎千金馬放長
林外七萃人歸禁衛中

其五十九

秉鉞親驅到不毛永清勲業並雲高我

皇手射天狼墜汗馬猶思將士勞

其六十

迅掃邊塵六服同 睿謀獨決建神功請賡塞上平

戎曲冀雜簫韶入 舜聰

題劉退菴師伯墳篋家慶圖

經傳帝氏盛家聲少長神同秋水清誰似荆花相映
處更看玉樹繞堦榮

其二

吾師疇昔秉三銓晨夕欣瞻水鏡懸淮海忽驚千里
隔幾年不到絳紗前

謂選君
劉夫子

其三

健翮聯翮上紫虛弟兄華髮尚同居和鳴我亦饒鴻
雁仰視鷁鸞愧不如

相國合肥座師招集宛平閣師豐臺園亭讌賞
芍藥賦謝

紅藥豐臺色正嬌看花結隊玉驄驕為貪卯飲隨裴
相爭傍山村問午橋

其二

觸目斑斕錦萬層宛鋪紫綺與紅綾憑教天女鳴機
杼欲織如花恐未能

其三

朱欄曲折繞亭臺坐對晴牕四面開暗裏忽聞蘭麝
發眾花深處好風來

其四

蘭桂能調五味同更資芍藥有全功當筵不少和羹
具總入元公鼎鼐中

其五

傾城自古說彞光今見芳容醉後粧肯向花中稱侍
女丰姿端的駕姚黃

其六

參差嫋嫋滿平坡孰識花枝幾許多縱得劉鞭能笑
手紛紜無數柰花何

其七

追陪杖履幾徘徊
瀟灑臨風實快哉
竟日不知紅旭射
綠陰庭下有高槐

堂前有大槐幾株

其八

滿院開齊百畝花
鮮妍一片爛如霞
紫分相國腰間綬
紅映先生帳上紗

其九

鳳雛相引集林端
共聽笙歌日未殘
紅藥不須矜國色
謝庭元自有芝蘭

時丹壑前輩在座

其十

一曲前溪繞畫梁
垂垂夏木掛斜陽
西山亦解遊人

意更送長蛾過短墻

墻外西山在望

其十一

朱紫繁華衆所懽
從來皓質少人看
自知夙抱文園疾
偏愛階前玉露盤

詠芍藥白

其十二

楊園疇昔泛流霞
此日重携玩物華
夫子翻勞頻載酒
問奇漫道有侯芭

和韻題查可亭塞草畫扇

天邊芳草徧龍城
白白紅紅也動情
色似佳人偏有韻
跡同幽客善逃名

其二

黃沙絕漠豈無春
爭柰花時不見人
多少自開還自
落寂寥虛度艷陽辰

題芙蓉蛺蝶畫扇

南國寒花歲晚多
臙脂端的比青娥
相思欲采芙蓉
去一片秋江奈遠何

其二

木末輕紅吐艷葩
何來蛺蝶帶風斜
愛伊不作遊蜂
態祇向三春覓好花

季秋同人集周礪岩寓齋分賦秋月

盍簪好友共追懽
古院更深皓月寒
同凭闌干凝望
久一時秋思滿長安

其二

我有漁庄泖水邊
每思蓴鱸路三千
無端猶是江南
月客裏愁看忽五年

其三

薊苑西風落木餘
閑將一卷送居諸
嫦娥亦念然藜
客時遣清光伴讀書

其四

豪家月白夜如何
賓客填門舞復歌
豈盡庾公饒逸

興南樓月色占偏多

其五

一官同老積薪中著作生平笑送窮吾党那嫌霜月
冷玉堂原是廣寒宮

其六

垂垂短髮已星星義馭難教片刻停塞雁一聲增百
感不堪又向月中聽

其七

興來得句付詩囊十載驅馳翰墨場秋月豈無牛渚
好高吟誰復問袁郎

其八

論交松柏歲寒期良夜相逢醉莫辭但願故人常對
酒不隨圓月有盈虧

康熙三十八年春二月

聖駕南巡觀河省方布德詩

時九齡

扈從

昇平

聖主坐垂裳萬國共球集

廟堂治至神堯無一事尚

煩 帝念是懷襄

其二

淮揚久被濁河災幾載田疇半草萊水底陽侯方跋

扈伐蛟須待 六龍來

其三

省方古帝有成謨 奧壤如今說五湖 此去觀河兼問俗 望中風物入吳都

其四

三農

元后重春畦 愛聽山村布穀啼 佇見杏花菖葉裏 躬

乘青輅問鋤犁

其五

瀕行

天綽布彤庭 衽席期看

日馭經欲使 問閭

沾雨露先從號令振 風霆

禁騷擾

其六

鑾輅時巡出 九霄潞河春水漾 輕橈層冰所向渾無

碍盡是

陽和着處消

其七

長樂

天王日問安 芳春躬奉出 金鑾欲從刊 木勤民際晨

夕親承

聖母歡

奉皇太后同行

其八

乘流彩鷁向江關
縹緲鸞旂霄漢間
白首黃童咸拜
手春風三度識
龍顏
士民迎鑾

其九

嘉麥青青隴畔生
摧殘特旨禁人行
今年定獻漁
陽瑞總荷天工
雨露成
禁傷麥

其十

戶設香盆結綵迎
薰天燈火滿江城
至尊特禁陳供
張無那愚氓
愛戴誠
禁供億

其十一

躬視河流日幾回
欲將沉竈作春臺
任教白水黃茅

地 龍馬衝泥盡到來

其十二

烟波何處植桑麻
六馬欣瞻駕日車

天子自行沉璧玉
寧愁春浪漲桃花

其十三

治河聚訟易紛更
疏築訐謨指授明
神禹若非乘
四載那能天地
奏平成
指授治河方略

其十四

滔滔何策救荒蕪
偶借丹青寫
帝謨曲折瞭然同
指掌 天心自是有河圖
親繪河圖

其十五

國計應從邦本謀觀民

聖后問西疇何方博得 天顏喜麥浪千層慶有秋 觀麥

其十六

恤民 聖意重催科浩蕩恩沾 翠蓋過積欠如山

蠲百萬賜租寧數漢家多 蠲積逋

其十七

關門壁立問津艱減稅 綸傳碧落間估客往來含

笑渡江湖不識有重關 減關稅

其十八

眾商比户共謳歌課額新除累萬多煮得吳鹽如雪

積可知滄海是 恩波 減鹽課

其十九

盛代含弘少棄材未為槁木尚堪栽欣看破甑成完

璧共沐 天恩再造來 免地方官處分

其二十

造就英尤托泮宮遴材額外 主恩隆吳江浙水靈

蛇有採盡隋珠入網中 增江浙入泮額

其二十一

乾坤 帝澤自同流更向園扉恤楚囚三面悉開教

解網不妨江海漏吞舟宥罪

其二十二

郡邑邊河濁浪中救荒平糶有奇功截將飛輓天
倉粟遍濟嗷嗷澤國鴻截漕米減價以糶

其二十三

聖壽如松樂萬春三吳父老祝 蒿辰微芹悉却

温綸切寸草猶虞費野人萬壽節吳民進壽筵上婉諭却之

其二十四

聖皇純孝古今稀茂苑陽春駐羽旂滿酌流霞爭獻處

尚聞 天語念

重闈

上諭吳民云自太皇太后賓天後壽日從不受賀

其二十五

羣生覆載感恩施香火爭陳祝嘏詞貝葉願將千佛
力

慈寧長對萬年枝

吳民祝皇太后聖壽

其二十六

宣賜貂裘自紫微天垂雲漢更光輝諸臣拜領真何
幸手捧宸章着御衣賜督撫等裘衣御筆

其二十七

皤皤黃髮享遐齡 御筆親題海鶴形天上遙瞻東

壁府文光常映老人星

賜百歲老人
御書海鶴風姿四字

其二十八

共仰 皇衷夙好文禹陰寸惜勵精勤萬機秉燭

親裁後猶自揮毫到夜分

午夜
臨池

其二十九

車駕乘春省俗時秋毫無擾肅諸司漁庄酒肆渾如

故 萬乘雷行總不知

途間
安堵

其三十

四民辛苦首農功春省吟成 睿藻工自是 宸衷

崇稼穡陳詩不待獻函風

其三十一

望 幸雲霓渴九霄地連吳越豈迢遙太陽自識傾

葵志早見 恩光徧六橋

浙江官民請
駕

其三十二

越中黎庶喜來蕪錢局新停 德意敷造化有銅成

萬物泉刀不用鑄洪鑪

傳浙江
鼓鑄

其三十三

時邁金陵 法駕留寢園洪武念松楸誰能異代勞

天步親捧椒漿拜一杯

親祭明太祖
陵

其三十四

御額咸欽翰墨精鍾山 帝子捧書行品題治術經

天筆青史千秋有定評 御書治隆唐宋四大字 命皇子寶懸洪武陵殿

其三十五

柳營校閱集熊羆挾矢爭看射戟枝盛治揆文兼奮

武觀兵宜在太平時 閱兵

其三十六

金山千丈削芙蓉 翠輦經時駐碧峰笑指長江魚

競躍妙高臺上有 真龍 網魚 金山

其三十七

風吹青雀鳳旗揚驛路江南繡陌長總欲田間全麥

穗特令扈 蹕罷龍驤 撤扈 行兵

其三十八

民間輸稅有常時長吏追呼不可遲忽聽緩征傳

鳳詔無勞糶穀賣新絲 命帶征

其三十九

奸民爭擬瀆 明廷刁健風除萬姓寧 輦路不教

陳肺石青天魑魅自潛形 禁沿途

其四十

南國郊垌接巨川洪波嚙處少炊烟

君王素切如傷念轉覺江淮異昔年 上諭云江淮一帶民生窮困不似往時

其四十一

四海清寧 帝業崇法天乾健戴 皇躬行宮每觀
綸音下玉漏聲催午夜中

其四十二

玉露風飄滿禁林 恩多滄海未為深雲中人拜天
孫織篋裏歸函內府金 賜內大臣以上
銀幣

其四十三

柳暗花穠水國春霓旌駐處 御筵陳天厨特擘麒
麟脯 勅賜追陪鳳輦人 賜從官宴

其四十四

從臣雲集翠華前捧 賜橙糕下九天甘美宛嘗仙
掌露清芬猶帶 御爐烟 賜從官橙糕

其四十五

嘉橘香甜眾果無如朱顏色勝珊瑚天家自 賜蓬
萊實千樹何勞種木奴 賜從官橘

其四十六

櫻桃 頒賜集麟臺何處薰風拂面來丹鳥初啣朱
夏到赤盤旋捧火珠回 立夏
賜從官櫻桃

其四十七

紛紜士庶集帷城稽首爭攀 鳳舸行十載 六飛

方一幸願留信宿慰輿情

士民留駕

其四十八

微臣東觀幸遭逢忽拜天書湛露濃什襲一門傳

世寶蓬衡千載仰

飛龍

蒙

賜御書視草二大字

其四十九

天高小草愧難酬驅策時蒙駑馬收鼓檝特令隨

豹尾含毫還

許傍龍舟

蒙令扈從

其五十

春藹龍翔鷁首東天回絳闕正薰風請磨千仞

吳山石虔勒

南巡萬世功

題史慕遠折枝牡丹畫為其夫人悼亡也

牡丹穠艷冠羣葩失偶潘郎感物華玉折不成連理

樹春歸空對斷腸花

其二

百花榮落任東皇觸目殘英淚幾行羨殺芙蓉常並

蒂不堪獨立號花王

頌歸德李三姐孝烈

矢報親仇弱息孤忘身克黨卒全屠拔刀凌統真堪

笑不殺甘寧枉丈夫

手刃仇家

其二

元惡雖除志未平請誅謀主走
天京叫闢親伐麒
麟鼓肯數緹縈代父名叩
闢鳴冤

其三

蘭閨菽水盡承歡晨夕常依老母單
欲向堂前成孝鳥那知世上有雙鸞
終身不嫁

其四

傳家一脉少孤雛獨累丘墳筋力枯
三載拮据躬負土千秋今復有顏烏
負土成墳

其五

母恙垂危日籲天奉親事畢赴重泉
殺身何異程嬰

志地下終期報趙宣

葬畢自盡

題彭太夫子志渠齋遺像後應侍講夫子命

高齋疇昔一留連回首秋風已數年
今日披圖瞻道貌依稀猶似拜床前

其二

吾師純孝采陔蘭孺慕終身自古難
手澤劇憐盈萬卷讀時總作蓼莪看

其三

先人斗室著書工小子恒慚鯉對同一別
慈顏終古恨夢魂空繞影堂中

送杜大宗伯肇餘前輩致政還嘉禾

勲名斗嶽重楓宸東髮登朝四十春一疏乞歸
優詔許明時出處有完人

其二

濟世羣推柱石才位高常伯領容臺
兩朝耆碩靈光在曾侍

先皇玉案來

其三

鳴騶滿路有光輝賢達乘秋一棹歸
漫道二疏千載後東門供張世間稀

其四

遂初賦就得閑居黃髮從容樂自如
勇退不須年七十薛公門第早懸車

其五

鳴玉班中忝後生濫竽非分溷公卿
年來奏事金華裡每傍尚書聽履聲

其六

樵李山川入畫圖還鄉踪跡狎潛夫
無邊烟水君王賜笑取鴛湖作鏡湖

牧堂上人之燕掃祖塋兼禮五臺山

昔年話別五茸城擬向清涼不計程今日披圖燕市
裡萬山真見一人行

牧堂繪
北遊圖

其二

掃塿崎嶇到朔方淵源水木感恩長吾儒豈少傳經
者身後誰燒一瓣香

其三

袞袞黃塵染客衣相逢暫爾在 京畿一官我是籠
中鳥指點孤雲羨鶴飛



